

MISSÆ PROPRIÆ DICECESEOS PASSAVIENSIS

Die 4 Decembris
S. BARBARÆ VIRG. ET MART.

Duplex majus

Missa Loquébar, de Communi Virgini-
num 1 loco.

Et fit Commemoratio S. Petri Chryso-
logi Ep., Conf. et Eccl. Doct., ut in Mis-
sali hac die, et Feriæ. Dicitur Credo,
ratione Commemorationis S. Doctoris.

Die 23 Decembris
B. HARTMANNI EP. ET CONF.

Duplex

Missa Státuit, de Communi Confesso-
ris Pontificis 1 loco, præter Orationem
sequentem:

Oratio

P

Omnípotens sempitérne Deus,
qui hujus diéi venerándam
sanctámque lætítiam in beáti
Hartmánni Confessóris tui at-
que Pontíficis solemnitate consecrásti:
da córdibus nostris tui amóris augmén-
tum; ut, cujus pia mérita venerámur in
terris, illúus in cælo patrocínia sentiámus.
Per Dóminum nostrum.

Et fit Commemoratio Feriæ.

Secreta

C

Sancti tui, quæsumus, Dómine, nos
ubíque lætíficent: ut, dum eórum
mérita recólimus, patrocínia sentiámus.
Per Dóminum nostrum.

Postcommunio

C

Præsta, quæsumus, omnípotens Deus:
ut, de percéptis munéribus grátias
exhibéntes, intercedénte beáto Hart-

máno Confessóre tuo atque Pontífice,
beneficia potióra sumámus. Per Dómi-
num nostrum.

Die 26 Decembris

S. STEPHANI PROTOMARTYRIS
Patroni principalis Civitatis episcopalis
et Titularis Ecclesiæ Cathedralis
Duplex I classis cum Octava communi

Missa ut in Missali hac die, mutato
ritu. In Ecclesiis S. Stephano dedicatis
et in Civitate episcopali dicitur Credo,
per totam Octavam.

¶ Diebus 29, 30 et 31 Decembris fit
Com. Octavæ, juxta Rubricas.

In die Octava autem Missa dicitur ut
in Missali eadem die.

Die 7 Januarii

S. VALENTINI EP. ET CONF.

Diceceoseos Patroni

Duplex I classis cum Octava communi
Introitus Eccli. 45, 30

Státuit ei Dóminus testaméntum pa-
cis, et princípem fecit eum: ut sit
illi sacerdotií dignitas in ætérnum.
Ps. 131, 1 Meménto, Dómine, David: et
omnis mansuetúdinis ejus.

V. Glória Patri.

In Ecclesia Cathedrali

Oratio

Propitiáre, quæsumus, Dómine, nobis
fámulis tuis per beáti Valentíni
Confessóris tui atque Pontíficis, qui in
hac Cathedráli Ecclesiá requiéscit, mé-
rita gloriósa: ut ejus pia intercessióne
ab ómnibus protegámur advérsis. Per
Dóminum nostrum.

Extra Ecclesiam Cathedrallem

Oratio

Propitiare, quæsumus, Dómine, nobis fámulis tuis per beáti Valentíni Confessóris tui atque Pontíficis mérita gloriósa: ut ejus pia intercessióne ab ómnibus protegámur advérsis. Per Dóminum nostrum Jesum Christum, Fílium tuum: Qui tecum vivit et regnat.

Et fit Commemoratio Octavæ Epiphaniæ Domini:

Oratio

Deus, qui hodiérna die Unigénitum tuum géntibus stella duce revelásti: concède propítius; ut, qui jam te ex fide cognóvimus, usque ad contemplándam spéciem tuæ celsitúdinis perducámur. Per eúndem Dóminum nostrum.

Lectio libri Sapiéntiæ

Eccli. 44, 16-27; 45, 3-20

Ecce sacérdos magnus, qui in diébus suis plácuít Deo, et invéntus est justus: et in témpore iracúndiæ factus est reconciliátio. Non est invéntus símilis illi, qui conservávit legem Excélsi. Ideo jurejurándo fecit illum Dóminus créscere in plebem suam. Benedictiónem ómnium géntium dedit illi, et testaméntum suum confirmávit super caput ejus. Agnóvit eum in benedictiónibus suis: conservávit illi misericórdiam suam: et invénit grátiam coram óculis Dómini. Magnificávit eum in conspéctu regum: et dedit illi corónam glóriæ. Státuit illi testaméntum ætérnum, et dedit illi sacerdotium magnum: et beatificávit illum in glória. Fungi sacerdotio, et habére laudem in nómine ipsíus, et offérre illi incénsus dignum in odórem suavitátis.

Graduale Eccli. 44, 16 Ecce sacérdos magnus, qui in diébus suis plácuít Deo.

V. *Ibid.*, 20 Non est invéntus símilis illi, qui conserváret legem Excélsi.

Allelúja, allelúja. V. Ps. 109, 4 Tu es sacérdos in ætérnum, secúndum órđinem Melchisedech. Allelúja.

✠ Sequéntia sancti Evangélii secúndum Mattháeum

Matth. 25, 14-23

In illo témpore: Dixit Jesus discíplis suis parábolam hanc: Homo péregre proficéscens vocávit servos suos, et trádidit illis bona sua. Et uni dedit quinque talénta, álii autem duo, álii vero unum, unicuique secúndum própriam virtútem, et proféctus est statim. Abiit autem, qui quinque talénta accéperat, et operátus est in eis, et lucrátus est ália quinque. Similiter et, qui duo accéperat, lucrátus est ália duo. Qui autem unum accéperat, ábiens fodit in terram, et abscondit pecúniam dómini sui. Post multum vero témporis venit dóminus servórum illórum, et pósuit ratiónerum cum eis. Et accédens qui quinque talénta accéperat, óbtulit ália quinque talénta, dicens: Dómine, quinque talénta tradidísti mihi, ecce, ália quinque superlucrátus sum. Ait illi dóminus ejus: Euge, serve bone et fidéls, quia super pauca fuísti fidéls, super multa te constítuam: intra in gáudium dómini tui. Accéssit autem et qui duo talénta accéperat, et ait: Dómine, duo talénta tradidísti mihi, ecce, ália duo lucrátus sum. Ait illi dóminus ejus: Euge, serve bone et fidéls, quia super pauca fuísti fidéls, super multa te constítuam: intra in gáudium dómini tui.

Credo, per totam Octavam.

Offertorium Ps. 88, 21-22 Invéni David servum meum, óleo sancto meo unxi eum: manus enim mea auxiliábitur ei, et bráchium meum confortábit eum.

Secreta

Sancti Valentini Confessoris tui atque Pontificis, quæsumus, Dómine, ánnua solémnitas pietáti tuæ nos reddat accéptos: ut, per hæc piæ placatiónis officia, et illum beáta retribútio comitétur, et nobis grátiae tuæ dona concíliet. Per Dóminum nostrum.

Pro Octava**Secreta**

Ecclésiæ tuæ, quæsumus, Dómine, dona propítius intuére: quibus non jam aurum, thus et myrrha profértur; sed quod eisdem munéribus declarátur, immolátur et súmitur, Jesus Christus, Fílius tuus, Dóminus noster: Qui tecum vivit et regnat.

Præfatio et Communicánte de Epiphania, ratione Octavæ.

Communio Luc. 12, 42 Fidélis servus et prudens, quem constituit dóminus super famíliam suam: ut det illis in témpore trítici mensúram.

Postcommunio

Deus, fidélium remunerátor animárum: præsta; ut beáti Valentini Confessoris tui atque Pontificis, cujus venerándam celebrámus festivitátem, précibus indulgéntiam consequámur. Per Dóminum nostrum.

Pro Octava**Postcommunio**

Præsta, quæsumus, omnipotens Deus: ut, quæ solémniter celebrámus officio, purificátæ mentis intelligéntia consequámur. Per Dóminum nostrum.

¶ **Infra Octavam de ea fit Commemoratio juxta Rubricas.**

In die Octava autem Missa dicitur ut in Festo cum Commemoratione S. Hilarii Ep., Conf. et Eccl. Doct. ac S. Felicis Presb. et Mart., ut in Missali eadem die; dicitur Præfatio communis.

Die 19 Januarii

S. SEVERINI ABBATIS

Duplex**Introitus Ps. 36, 30-31**

Os justi meditábitur sapiéntiam, et lingua ejus loquétur júdicium: lex Dei ejus in corde ipsíus. **Ps. ibid., 1** Noli æmulári in malignántibus: neque zeláveris faciéntes iniquitátem.

V. Glória Patri.

Oratio

Deus, qui in sanctis hábitas, et pia corda non déseris: líbera nos per intercessiónem beáti Severini a terrénis desidériis et cupiditáte carnis; ut tibi soli Dómino líberis méntibus serviámus. Per Dóminum nostrum.

Et fit Commemoratio Ss. Marii et Soc. Martyrum:

Oratio

Exáudi, Dómine, pópulum tuum cum Sanctórum tuórum patrocinio supplicántem: ut et temporális vitæ nos tríbuas pace gaudére; et ætérnæ reperíre subsídium. (Per Dóminum.)

Deinde Commemoratio S. Canuti Regis, Martyris:

Oratio

Deus, qui ad illustrándam Ecclésiám tuam beátum Canútum regem martýrii palma et gloriósis miráculis decoráre dignátus es: concéde propítius; ut, sicut ipse Domínicae passiónis imitátor fuit, ita nos, per ejus vestigia gradiéntes, ad gáudia sempitérna pervenire mereámur. Per eúndem Dóminum.

Léctio libri Sapiéntiæ

Eccli. 45, 1-6

Diléctus Deo et homínibus, cujus memória in benedictióne est. Símilem illum fecit in glória sanctórum, et magnificávit eum in timóre inimicó-

rum, et in verbis suis monstra placávit. Glorificávit illum in conspéctu regum, et iussit illi coram pópulo suo, et osténdit illi glóriam suam. In fide et lenitáte ipsíus sanctum fecit illum, et elégit eum ex omni carne. Audívit enim eum et vocem ipsíus, et indúxit illum in nubem. Et dedit illi coram præcépta, et legem vitæ et disciplínæ.

Graduale Ps. 20, 4-5 Dómine, prævenísti eum in benedictiónibus dulcédinis: posuísti in cápite ejus corónam de lápide pretiósó. **V.** Vitam pétiit a te, et tribuísti ei longitudinem díerum in sæculum sæculi.

Allelúja, allelúja. **V. Ps. 91, 13** Justus ut palma florébit: sicut cedrus Líbani multiplicábitur. Allelúja.

Post Septuagesimam, omissis Allelúja et Versu sequenti, dicitur

Tractus Ps. 111, 1-3 Beátus vir, qui timet Dóminum: in mandátis ejus cupit nimis. **V.** Potens in terra erit semen ejus: generatio rectórum benedicétur. **V.** Glória et divítiae in domo ejus: et justítia ejus manet in sæculum sæculi.

✠ Sequéntia sancti Evangélii secúndum Lucam

Luc. 12, 35-40

In illo témpore: Dixit Jesus discíplulis suis: Sint lumbi vestri præcíncti, et lucérnæ ardéntes in má nibus vestris, et vos símiles homínibus expectántibus dóminum suum, quando revertátur a núptiis: ut, cum vénerit et pulsáverit, conféstim apériant ei. Beáti servi illi, quos, cum vénerit dóminus, invénerit vigilántes: amen, dico vobis, quod præcínget se, et fáciét illos discúmbere, et tránsiens ministrábit illis. Et si vénerit in secúnda vigília, et si in tértia vigília vénerit, et ita invénerit, beáti sunt servi illi. Hoc autem scitóte, quóniam, si sci-

ret paterfamílias, qua hora fur veníret, vigiláret útique, et non síneret péríodi domum suam. Et vos estóte paráti, quia, qua hora non putátis, Fílius hóminis veníet.

Offertorium Ps. 20, 3 et 4 Desidérium animæ ejus tribuísti ei, Dómine, et voluntáte labiórum ejus non fraudásti eum: posuísti in cápite ejus corónam de lápide pretiósó.

Secreta

Sacris altáribus, Dómine, hóstias superpósitas sanctus Severínus Abbas, quæsumus, in salutem nobis proveníre depóscat. Per Dóminum nostrum.

Pro Ss. Martyribus

Secreta

Preces, Dómine, tuórum réspice oblationésque fidélium: ut et tibi grate sint pro tuórum festivitáte Sanctórum, et nobis cónferant tuæ propitiatiónis auxiliium. (Per Dóminum nostrum.)

Pro S. Canuto

Secreta

Accépta sit in conspéctu tuo, Dómine, nostra devótió: et ejus nobis fiat supplicatióne salutáris, pro cujus solemnitate defértur. Per Dóminum.

Communio Luc. 12, 42 Fidélis servus et prudens, quem constituit dóminus super famíliam suam: ut det illis in témpore trítici mensúram.

Postcommunio

Prótegat nos, Dómine, cum tui perceptiône sacraménti beátus Severínus Abbas, pro nobis intercedéndo: ut et conversatiónis ejus experiámur insígnia, et intercessiúnis percipiámus suffrágia. Per Dóminum nostrum.

Pro Ss. Martyribus

Postcommunio

Sanctórum tuórum, Dómine, intercessiône placátus: præsta, quæsumus; ut, quæ temporáli celebrámus actiône, perpétua salvatióne capiámus. (Per Dóminum nostrum.)

Pro S. Canuto

Postcommunio

Refécti participatióne múneris sacri, quæsumus, Dómine, Deus noster: ut, cujus exséquimur cultum, intercedente beáto Canúto Mártire tuo, sentiámus efféctum. Per Dóminum nostrum.

Die 25 vel 26 Februarii

S. WALBURGÆ VIRGINIS

Duplex

Missa Dilexísti, de Communi Virginum 3 loco, præter Orationes sequentes:

Oratio

P

Deus, qui inter innúmera grátiae tuæ dona étiam in sexu femíneo tua operáris magnália: concéde propítius: ut beátæ Walbúrgæ Vírginis tuæ apud misericórdiam tuam patrocínia sentiámus, cujus non solum castitátis illustrámur exémpis, verum étiam miraculórum glória jucundámur. Per Dóminum nostrum.

Et, in Quadragesima, fit Commemoratio Feriæ in Missis non conventualibus; et de ea legitur Evangelium in fine, juxta Rubricas.

Secreta

P

Sacrificium oblátum, quæsumus, Dómine, beátæ Walbúrgæ Vírginis tuæ orátio majestáti tuæ reddat accéptum: pro cujus veneránda commemoratióne tibi devóto offértur obséquio. Per Dóminum nostrum.

Postcommunio

P

Benedictiónis tuæ, Dómine, grátiam, intercedente beáta Walbúrga Vírgine tua, cónsequi mereámur: ut, cujus venerándam glóriam prædicámus; ejus in ómnibus nostris necessitatibus auxiliium sentiámus. Per Dóminum nostrum Jesum Christum, Fílium tuum: Qui tecum vivit et regnat.

Die 15 Martii

S. CLEMENTIS MARIE HOFBAUER
CONFESSORIS

Duplex majus

Missa Justus, de Communi Confessoris non Pontificis 2 loco, præter Orationes sequentes:

Oratio

P

Deus, qui beátum Cleméntem Mariam miro fidei róbre et invictæ constantiæ virtúte decorásti; ejus méritis et exémpis fac nos, quæsumus, ita fortes in fide et caritáte ferventes; ut præmia consequámur ætérna. Per Dóminum nostrum.

Et, in Missis non conventualibus, fit Commemoratio Feriæ; et de ea legitur Evangelium in fine, juxta Rubricas.

Secreta

P

Ille nos, quæsumus, Dómine, devotiónis ignis accéndat; quo beátus Clemens Maria, dum salutárem offerret hóstiam, júgiter flagrávit. Per Dóminum.

Postcommunio

P

Cælésti pane reféctis concéde nobis, omnipotens Deus; ut beáti Cleméntis exémplo in fortitúdone cibi illius usque ad montem, qui Christus est, feliciter perveniámus: Qui tecum vivit.

Die 27 Martii

S. RUPERTI
EPISCOPI ET CONFESSORIS

Duplex majus

Missa Státuit, de Communi Confessoris Pontificis 1 loco.

Et, in Quadragesima, fit Commemoratio Feriæ in Missis non conventualibus; et de ea legitur Evangelium in fine, juxta Rubricas.

Die 5 Aprilis

B. CRESCENTLÆ HOSS VIRGINIS

Duplex

Missa Dilexisti, de Communi Virginum
3 loco, præter Orationes sequentes:

Oratio

P

Deus, qui in beata Crescentia Virgine tua christiænæ perfectiõnis exemplum misericorditer tribuisti; præsta, quæsumus; ut, ejus imitatiõni jûgiter inhærentes, glóriam consequamur æternam. Per Dóminum nostrum.

Et fit Commemoratio S. Vincentii Ferrerii Conf.:

Oratio

Deus, qui Ecclesiã tuam beati Vincentii Confessoris tui méritis et prædicatiõne illustrãre dignatus es: concede nobis fãmulis tuis; ut et ipsi in instruãmur exémpis et ab ómnibus ejus patrocinio liberemur advérsis. (Per Dóminum nostrum.)

Deinde, in Quadragesima, fit Commemoratio Feriæ in Missis non conventualibus; et de ea legitur Evangelium in fine, juxta Rubricas.

Secreta

P

Sacrificium, Dómine, quod offerimus, súscipe placatus: et, intercedente beata Crescentia, quæ inter mundanas sordes immaculatum virginitatis florem custodivit, concede; ut ómnia ópera nostra sint tibi sacrificium laudis in odorem suavitatis. Per Dóminum nostrum.

Pro S. Vincentio Ferrerio

Secreta

Laudis tibi, Dómine, hóstias immolamus in tuórum commemoratiõne Sanctórum: quibus nos et præsentibus exui malis confidimus et futúris. (Per Dóminum nostrum.)

Postcommunio

P

Pretiosi Córporis et Sánguini tui mystériis refécti, Dómine, precámur; ut beátæ Crescentiæ præclára virtutum exémpa sequentes; ómnibus amóntis periculis, ad te feliciter perveniámus: Qui vivis et regnas cum Deo Patre in unitate Spíritus Sancti Deus.

Pro S. Vincentio Ferrerio

Postcommunio

Refécti cibo potúque cælesti, Deus noster, te súpplices exorámus: ut, in cujus hæc commemoratiõne percépi-mus, ejus muniámur et précibus. (Per Dóminum nostrum.)

Die 19 Aprilis

S. LEONIS IX
PAPÆ ET CONFESSORIS

Duplex

Missa Státuit, de Communi Confessoris Pontificis 1 loco.

Et, in Quadragesima, fit Commemoratio Feriæ in Missis non conventualibus; et de ea legitur Evangelium in fine, juxta Rubricas.

Die 21 Aprilis

S. CONRADI A PARZHAM
CONFESSORIS

Duplex II classis

Introitus Eccli. 35, 21

Oratiõ humiliantis se nubes penetrabit: et donec propínquet non consolábitur; et non discédet donec Altíssimus aspiciat, allelúja, allelúja. Ps. 76, 2 Voce mea ad Dóminum clamávi; voce mea ad Deum, et inténdit mihi.

V. Glória Patri.

Oratio

Deus, qui misericórdiæ tuæ jánuam fidélibus patére voluísti: te súpplices exorámus; ut, intercedénte beáto Conrádo Confessóre tuo, temporália subsidia nobis tríbuas et ætérna. Per Dóminum nostrum Jesum Christum, Fílium tuum: Qui tecum vivit et regnat.

Et fit Commemoratio S. Anselmi Ep., Conf. et Doct.:

Oratio

Deus, qui pópulo tuo ætérnæ salutis beátum Ansélmum minístrum tribuísti: præsta, quæsumus; ut, quem Doctórem vitæ habuimus in terris, intercessórem habére mereámur in cælis. Per Dóminum nostrum.

Lectio libri Sapiéntiæ

Eccli. 31, 8-11

Beátus vir, qui invéntus est sine mácula, et qui post aurum non ábiit, nec sperávit in pecúnia et thesáuris. Quis est hic, et laudábimus eum? fecit enim mirabília in vita sua. Qui probátus est in illo, et perféctus est, erit illi glória ætérna: qui pótuit tránsgrredi, et non est tránsgréssus: fácere mala, et non fecit: ideo stabilíta sunt bona illíus in Dómino, et eleemósynas illíus enarrábit omnis ecclésia sanctórum.

Tempore Paschali:

Allelúja, allelúja. **V. Ps. 111, 9** Dispérsit, dedit paupéribus; justítia ejus manet in sæculum sæculi. Allelúja. **V. 2 Mach. 15, 14** Hic est fratrum amátor et pópuli Israel: hic est qui multum orat pro pópulo. Allelúja.

In Missis votivis extra Tempus Paschale omittuntur Allelúja ad Introitum, Offertorium et Communionem, et post Epistolam dicitur

Graduale 2 Mach. 15, 12 Ecce virum bonum et benígnum, verecúndum visu, modéstum móribus, manus protendéntem. **V. Ibid., 14** Hic est fratrum amátor et pópuli Israel: hic est qui multum orat pro pópulo.

Allelúja, allelúja. **V. Ps. 111, 9** Dispérsit, dedit paupéribus: justítia ejus manet in sæculum sæculi. Allelúja.

Post Septuagesimam, omissis Allelúja et Versu sequenti, dicitur

Tractus Eccli. 29, 1 Qui facit misericórdiam, fœnerátur próximo suo: et qui prævaleat manu, mandáta servat. **V. Ib., 14-15** Pone thesáurum tuum in præcéptis Altíssimi, et próderit tibi magis quam aurum. **V. Conclúde** eleemósynam in corde pauperis, et hæc pro te exorábit ab omni malo.

Sequéntia sancti Evangélii secúndum Matthæum

Math. 11, 25-30

In illo témpore: Respóndens Jesus, dixit: Confíteor tibi, Pater, Dómine cæli et terræ, quia abscondísti hæc a sapientibus et prudéntibus, et revelásti ea párvulis. Ita Pater: quóniam sic fuit plácitum ante te. Omnia mihi trá dita sunt a Patre meo. Et nemo novit Fílium, nisi Pater: neque Patrem quis novit, nisi Fílius, et cui volúerit Fílius reveláre. Veníte ad me omnes, qui laborátis, et onerátí estis, et ego refíciam vos. Tóllite jugum meum super vos, et discite a me, quia mitis sum, et húmilis corde: et inveniétis réquiem animábus vestris. Jugum enim meum suáve est, et onus meum leve.

Credo, ratione Commemorationis S. Doctoris.

Offertorium Act. 10, 4 Oratiónes tuæ et eleemósynæ tuæ ascendérunt in memóriam in conspéctu Dei, allelúja.

Secreta

Oblatiónes nostras tibi, Dómine, quæsumus, beáti Conrádi intercessio veneránda comméndet: quem coram tuis altáribus precántem supernórum charísmatum dulcédine recreásti. Per Dóminum nostrum.

Pro S. Anselmo**Secreta**

Sancti Ansélmi Pontíficis tui atque Doctóris nobis, Dómine, pia non desit orátio: quæ et múnera nostra concíliet; et tuam nobis indulgéntiam semper obtíneat. Per Dóminum nostrum.

Communio **Matth. 11, 29** Dísците а me, quia mitis sum et húmilis corde, allelúja.

Postcommunio

Súmpsimus, Dómine, tua sancta, beáti Conrádi mérita recoléntes: præsta, quæsumus; ut ejus semper et præcláro proficiámus exémplo et fidéli muniámur auxílio. Per Dóminum nostrum.

Pro S. Anselmo**Postcommunio**

Ut nobis, Dómine, tua sacrificia dent salutem: beátus Ansélmus Póntifex tuus et Doctor egrégius, quæsumus, precátor accédát. Per Dóminum.

Die 27 Aprilis

S. PETRI CANISII
CONFESSORIS ET ECCL. DOCT.**Duplex II classis****Introitus Eccli. 15, 5**

In médio Ecclésiæ aperuit os ejus: et implévit eum Dóminus spírítu sapiéntiæ et intelléctus: stolam glóriæ induit eum, allelúja, allelúja. **Ps. 91, 2** Bonum est confitéri Dómino: et psállere nómini tuo, Altíssime.

V. Glória Patri.**Oratio**

Deus, qui ad tuéndam catholicam fidem beátum Petrum Confessórem tuum virtúte et doctrína roborásti: concède propítius; ut ejus exémples et mónitis errántes ad salutem respícant, et fidéles in veritátis confessióne perseverént. Per Dóminum nostrum.

Léctio Epístolæ beáti Pauli Apóstoli ad Timótheum **2 Tim. 4, 1-8**

Caríssime: Testíficor coram Deo, et Jesu Christo, qui judicatúrus est vivos et mórtuos, per advéntum ipsíus et regnum ejus: prædica verbum, insta opportúne, importúne: árgue, óbseca, íncrepa in omni patiéntia, et doctrína. Erit enim tempus, cum sanam doctrínam non sustinébunt, sed ad sua desidéria coacervábunt sibi magístros, pruriéntes áuribus, et a veritate quidem audítum avértent, ad fábulas autem converténtur. Tu vero vígila, in ómnibus labóra, opus fac Evangelístæ, ministérium tuum imple. Sóbrius esto. Ego enim jam delíbor, et tempus resolutiónis meæ instat. Bonum certámen certávi, cursum consummávi, fidem servávi. In réliquo repósa est mihi coróna justítiæ, quam reddet mihi Dóminus in illa die, justus judex: non solum autem mihi, sed et iis, qui díligunt advéntum ejus.

Allelúja, allelúja. **V. Ps. 118, 46** Loquébar de testimóniis tuis in conspéctu regum, et non confundébar. Allelúja. **V. 1 Cor. 9, 22** Omnia ómnibus factus sum, ut omnes fácerem salvos. Allelúja.

In Missis votivis per annum dicitur

Graduale Ps. 118, 129-130 Mirabília testimónia tua, Dómine, ideo scrutáta est ea ánima mea. **V.** Declarátio sermónum tuórum illúminat et intelléctum dat párvulis.

Allelúja, allelúja. **V. Ps. 108, 30** Confitebor Dómino nimis in ore meo: et in médio multórum laudábo eum. Allelúja.

Post Septuagesimam, omissis Allelúja et Versu sequenti, dicitur

Tractus Ps. 118, 104, 105 et 158 A mandátis tuis intelléxi, proptérea odívi omnem viam iniquitátis. **V.** Lucérna pédibus meis verbum tuum, et lumen sémitis meis. **V.** Vidi prævaricántes et tabescébam, quia elóquia tua non custodiérunt.

✠ Sequéntia sancti Evangélli secúndum Matthæum

Matth. 5, 13-19

In illo témpore: Dixit Jesus discípulis suis: Vos estis sal terræ. Quod si sal evanúerit, in quo saliétur? Ad níhilum valet ultra, nisi ut mittátur foras, et conculectúr ab homínibus. Vos estis lux mundi. Non potest civitas abscondi supra montem pósita. Neque accéndunt lucérnam, et ponunt eam sub módio, sed super candelábrum, ut líceat ómnibus qui in domo sunt. Sic líceat lux vestra coram homínibus, ut vídeant ópera vestra bona, et gloríficent Patrem vestrum, qui in cælis est. Nolíte putáre, quóniam veni sólvete legem aut prophétas: non veni sólvete, sed adimplére. Amen, quippe dico vobis, donec tránseat cælum et terra, jota unum aut unus apex non præteribit a lege, donec ómnia fiant. Qui ergo sólverit unum de mandátis istis mínimis, et docúerit sic hómines, mínimus vocábitur in regno cælórum: qui autem fécerit et docúerit, hic magnus vocábitur in regno cælórum.

Credo.

Offertorium Ps. 33, 12 Veníte, filii, audíte me: timórem Dómini docébo vos, allelúja.

Secreta

Sanctífica, miséricors Deus, hæc múnera tibi obláta, et Ecclesiæ tuæ, beáto Petro intercedénte, unitátis et pacis propítius dona concéde. Per Dóminum nostrum.

Communio Is. 12, 3 Hauriétis aquas in gáudio de fóntribus Salvatóris, allelúja.

Postcommunio

Sacrificium, Dómine, quod in honórem beáti Petri Confessóris tui atque Doctóris obtúlimus: fidem nostram, spem et caritátem áugeat, et Ecclesiam tuam nova semper prole lætifícet. Per Dóminum nostrum.

Sabbato primo mensis Maji

IN SOLEMNITATE B. MARIE VIRG.
PATRONÆ BAVARIÆ

Duplex I classis

¶ Extra Tempus Paschale omittuntur Allelúja ad Introitum, Offertorium et Communionem.

Introitus

Gaudéamus omnes in Dómino, Patrocínium celebrántes gloriósa Virginis Mariæ, de cujus solemnitate gaudent Angeli et colláudant Fílium Dei, allelúja, allelúja. **Ps. 43, 2** Deus, áuribus nostris audívimus: patres nostri annuntiavérunt nobis.

V. Glória Patri.

Oratio

Deus, qui dilécti Fílii tui Genitricem nobis Matrem ac Patrónam dare dignátus es: concéde propítius; ut sub hujus Matris tutelá ab omni hóstium defendámur incúrsu, et sine timóre in sanctitáte et justítia tibi serviámus. Per eúndem Dóminum nostrum.

Lectio libri Apocalýpsis beáti Joánnis
Apóstoli

Apoc. 12, 1, 5, 10 et 17

Signum magnum appáruit in cælo: múlter amícta sole et luna sub pédibus ejus et in cápite ejus coróna stellarum duódecim. Et péperit filium másculum, qui rectúrus erat omnes gentes in virga férrea, et raptus est filius ejus ad Deum et ad thronum ejus. Et audívi vocem magnam in cælo dicentem: Nunc facta est salus et virtus et regnum Dei nostri et potéstas Christi ejus, quia projectus est accusátor fratrum nostrórum, qui accusábat illos ante conspéctum Dei nostri díe ac nocte. Et irátus est draco in mulferem et ábiit fácere práelium cum réliquis de sémine ejus, qui custódiunt mandáta Dei et habent testimónium Jesu Christi.

Allelúja, allelúja. **V. Num. 17, 8** Virga Jesse flóruit: Virgo Deum et hóminem genuit: pacem Deus réddidit, in se reconcilians ima summis. Allelúja. **V. Luc. 1, 28** Ave, María, grátia plena; Dóminus tecum: benedícta tu in mulieribus. Allelúja.

Extra Tempus Paschale

Graduale Cant. 6, 3 et 9 Tota formósa et suávis es, filia Sion; pulchra ut luna, elécta ut sol, terríbilis ut castrórum ácies ordináta. **V. Judith 13, 22** Benedíxit te Dóminus in virtúte sua, quia per te ad nihilum redégit inimícos nostros.

Allelúja, allelúja. **V. Luc. 1, 28** Ave, María, grátia plena; Dóminus tecum: benedícta tu in mulieribus. Allelúja.

In Missis votivis post Septuagesimam, omissis Allelúja et Versu sequenti, dicitur

Tractus Ps. 44, 11 et 12 Audi, filia, et vide, et inclína aurem tuam: quia con-

cupívit Rex spéciem tuam. **V. Ib., 13 et 10** Vultum tuum deprecabúntur omnes dívites plebis: filíæ regum in honóre tuo. **V. Ibid., 15-16** Adducéntur Regi vírgines post eam: próximæ ejus afferéntur tibi. **V.** Afferéntur in lætítia et exultatióne: adducéntur in templum Regis.

✠ Sequéntia sancti Evangélii secúndum Joánnem

Joann. 2, 1-11

In illo témpore: Núptiæ factæ sunt in Cana Galilææ: et erat Mater Jesu ibi. Vocátus est autem et Jesus, et discípuli ejus ad núptias. Et deficiénte vino, dicit Mater Jesu ad eum: Vinum non habent. Et dicit ei Jesus: Quid mihi et tibi est, múlter? nondum venit hora mea. Dicit Mater ejus ministris: Quodcúmque díxerit vobis, fácite. Erant autem ibi lapídeæ hýdriæ sex pósitæ secúndum purificationem Judæórum, capiéntes singulæ metrétas binas vel ternas. Dicit eis Jesus: Impléte hýdrias aqua. Et implevérunt eas usque ad summum. Et dicit eis Jesus: Hauríte nunc, et ferte architriclino. Et tulérunt. Ut autem gustávit architriclínus aquam vinum factam, et non sciébat unde esset, ministri autem sciébant, qui háuserant aquam: vocat sponsum architriclínus, et dicit ei: Omnis homo primum bonum vinum ponit: et cum inebriáti fúerint, tunc id, quod detérius est. Tu autem servásti bonum vinum usque adhuc. Hoc fecit ínítium signórum Jesus in Cana Galilææ: et manifestávit glóriam suam, et credidérunt in eum discípuli ejus.

Credo.

Offertorium Jerem. 18, 20 Recordáre, Virgo Mater, in conspéctu Dei, ut loquáris pro nobis bona, et ut avértat indignatiónem suam a nobis, allelúja.

Secreta

Præsta, quæsumus, omnipotens Deus: ut, præcibus beætæ Mariæ semper Virginis, cujus Patrocinio gloriámur, fideles tui hóstiám salutárem tibi fervéntius offerant, et consequántur efféctum. Per Dóminum nostrum.

Præfatio de B. Maria Virg. Et te in Festivitaté.

Communio Cant. 2, 3 Sub umbra ilíus, quem desideráveram, sedi, et fructus ejus dulcis gútturi meo, allelúja.

Postcommunio

Cæléstibus pasti delíciis, te súpplices deprecámur, Dómine, Deus noster: ut, beáta María semper Virgine protegénte, ab erróribus sæculi carnísque illécebris serváti, et in fide inveniamur stábiles et in ópere effícaces. Per Dóminum nostrum.

Die 4 Maji

S. FLORIANI MARTYRIS**Duplex majus**

Missa Protexísti, de Communi Martyrum Tempore Paschali 1 loco, præter Orationem sequentem:

Oratio

P

Deus, qui nos ánnua beáti Floriáni Mártiris tui gloriósæ passiónis solemnitáte lætíficas: sólita pietátis tuæ largitaté concéde benignus; ut, cujus honóri célebrem triúmphum pio amóre venerámur in terris, societátis ejus lætítiam adipísci te largiénte mereámur in cælis. Per Dóminum nostrum.

Et fit Commemoratio S. Monicæ Viduæ:

Oratio

Deus, mæréntium consolátor et in te sperántium salus, qui beætæ Mónicæ piás lácrimas in conversióne filii

sui Augustíni misericórditer suscepísti: da nobis utriúsque intervéntu; peccáta nostra deploráre, et grátiae tuæ indulgéntiam inveníre. Per Dóminum.

Secreta C4

Accépta sit in conspéctu tuo, Dómine, nostra devótió: et ejus nobis fiat supplicatióne salutáris, pro cujus solemnitáte defértur. Per Dóminum nostrum.

Pro S. Monica **Secreta**

Accépta tibi sit, Dómine, sacrátæ plebis oblátio pro tuórum honóre Sanctórum: quorum se méritis de tribulatióne percepísse cognóscit auxiliúm. Per Dóminum nostrum.

Postcommunio C4

Relécti participatióne múnere sacri, quæsumus, Dómine, Deus noster: ut, cujus exséquimur cultum; intercedénte beáto Floriáno Mártire tuo, sentiámus efféctum. Per Dóminum nostrum Jesum Christum, Fílium tuum: Qui tecum vivit et regnat in unitáte Spíritus Sancti Deus.

Pro S. Monica **Postcommunio**

Satiásti, Dómine, famíliam tuam muneribus sacris: ejus, quæsumus, semper interventióne nos rélove, cujus solémnia celebrámus. Per Dóminum.

Die 5 Maji

**S. GODEHARDI
EPISCOPI ET CONFESSORIS****Duplex majus****Introitus Ps. 131, 9-10**

Sacerdótes tui, Dómine, índuant justítiam, et sancti tui exsúltent: propter David servum tuum, non avértas faciém Christi tui, allelúja, allelúja. **Ps. ibid., 1** Meménto, Dómine, David: et omnis mansuetúdinis ejus.

V. Glória Patri.

Oratio

Deus, qui hodiernam diem in beati Godehárdi Confessóris tui atque Pontíficis festivitáte nobis honorábilem fecisti: præsta, quæsumus; ut, cujus celebriatáte ánnua exsultámus, ejus suffrágiis adjuvémur. Per Dóminum nostrum.

Et fit Commemoratio S. Pii V Papæ et Conf.:

Oratio

Deus, qui, ad conteréndos Ecclésiæ tuæ hostes et ad divinum cultum reparándum, beátum Pium Pontíficem Máximum elígere dignátus es: fac nos ipsíus deféndi præsídiis et ita tuis inhærére obséquiis; ut, ómnium hóstium superátis insídiis, perpétua pace lætémur. Per Dóminum nostrum.

Léctio Epístolæ beati Pauli Apóstoli ad Hebræos

Hebr. 13, 7-17

Fratres: Mementóte præpositórum vestrórum, qui vobis locúti sunt verbum Dei: quorum intuéntes éxitum conversatiónis, imitámini fidem. Jesus Christus heri, et hódie: ipse et in sæcula. Doctrínis váriis et peregrínis nolíte abducí. Optimum est enim grátia stabilíre cor, non escis, quæ non profuérunt ambulántibus in eis. Habémus altáre, de quo édere non habent potestátem, qui tabernáculo deserviunt. Quorum enim animálium inférur sanguis pro peccáto in Sancta per pontíficem, horum córpora cremántur extra castra. Propter quod et Jesus, ut sanctificáret per suum sánguinem pópulum, extra portam passus est. Exeámus ígitur ad eum extra castra impropérium ejus portántes. Non enim habémus hic manéntem civitatém, sed futúram inquírimus. Per ipsum ergo offerámus hóstiam laudis semper Deo, id est fructum labiórum confiténtium nómini ejus. Beneficéntiæ autem et com-

muniónis nolíte oblivísci: tálibus enim hóstiis promerétur Deus. Obædíte præpósitis vestris et subjacéte eis. Ipsi enim pervigilant, quasi ratiónem pro animábus vestris redditúri.

Allelúja, allelúja. **V. Ps. 109, 4** Jurávit Dóminus, et non pœnitébit eum: Tu es sacerdos in ætérnum, secúndum órđinem Melchisedech. Allelúja. **V. Eccli. 45, 9** Amávit eum Dóminus, et ornávit eum: stolam glóriæ índuit eum. Allelúja.

✠ Sequéntia sancti Evangélii secúndum Matthæum

Matth. 24, 42-47

In illo témpore: Dixit Jesus discipulis suis: Vigiláte, quia nescítis, qua hora Dóminus vester ventúrus sit. Illud autem scitóte, quóniam, si sciret paterfamilias, qua hora fur ventúrus esset, vigiláret útique, et non síneret pérfodi domum suam. Ideo et vos estóte paráti: quia qua nescítis hora Filius hóminis ventúrus est. Quis, putas, est fidélis servus et prudens, quem constituit dóminus suus super familiam suam, ut det illis cibum in témpore? Beátus ille servus, quem, cum vénerit dóminus ejus, invénerit sic faciéntem. Amen, dico vobis, quóniam super ómnia bona sua constituet eum.

Offertorium Ps. 88, 25 Véritas mea et misericórdia mea cum ipso: et in nómine meo exaltábitur cornu ejus, allelúja.

Secreta

Sancti Godehárdi Confessóris tui atque Pontíficis, quæsumus, Dómine, ánnua solémnitas pietáti tuæ nos reddat accéptos: ut, per hæc piæ placatiónis officia, et illum beáta retribútió comitétur, et nobis grátia tuæ dona concíliet. Per Dóminum nostrum.

Pro S. Pio

Secreta

Sancti tui, quæsumus, Dómine, nos ubique lætificent: ut, dum eórum mérita recólimus, patrocínia sentiámus. Per Dóminum nostrum.

Communio **Matth. 24, 46-47** Beátus servus, quem, cum vénerit dóminus, invénierit vigilántem: amen, dico vobis, super ómnia bona sua constituet eum, allelúja.

Postcommunio

Deus, fidélium remunerátor animárum: præsta; ut beáti Godehárdi Confessóris tui atque Pontíficis, cujus venerándam celebrámus festivitátem, précibus indulgéntiam consequámur. Per Dóminum nostrum.

Pro S. Pio

Postcommunio

Præsta, quæsumus, omnipotens Deus: ut, de percéptis munéribus grátias exhibéntes, intercedénte beáto Pio Confessóre tuo atque Pontífice, benefícia potióra sumámus. Per Dóminum.

Die 16 Maji

S. JOANNIS NEPOMUCENI MART.

Duplex majus

Introitus **Eccli. 51, 30**

Dedit mihi Dóminus linguam mercedem meam: et in ipsa laudábo eum, allelúja, allelúja. **Ps. 38, 2** Dixi: Custódiám vias meas, ut non delinquam in lingua mea.

V. Glória Patri.

Oratio

Deus, qui ob invíctum beáti Joánnis sacramentále siléntium nova Ecclésiám tuam martýrii coróna decorásti: da; ut, ejus exémplo et intercessióne, ori nostro custódiám ponéntes, beátis, qui lingua non sunt lapsi, annumeré-

mur. Per Dóminum nostrum Jesum Christum, Fílium tuum: Qui tecum vivit et regnat in unitáte Spíritus Sancti Deus.

Et fit Commemoratio S. Ubaldi:

Oratio

Auxílium tuum nobis, Dómine, quæsumus, placátus impénde: et, intercessióne beáti Ubáldi Confessóris tui atque Pontíficis, contra omnes diabóli nequítias déxteram super nos tuæ propitiatiónis exténde. Per Dóminum.

Léctio libri Sapiéntiæ

Eccli. 21, 26-31

Stultus a fenéstra respíciet in domum: vir autem eruditus foris stabit. Stultítia hóminis auscultáre per óstium: et prudens gravábitur contumélia. Lábía imprudentium stulta narrábunt: verba autem prudentium statéra ponderabúntur. In ore fatuórum cor illórum: et in corde sapiéntium os illórum. Dum maledícit ímpius diabóolum, maledícit ipse ánimam suam. Susúrro coinquinábit ánimam suam, et in ómnibus odiétur: et, qui cum eo mánserit, odiósus erit: tácutus et sensátus honorábitur.

Allelúja, allelúja. **V. Eccli. 25, 11** Beátus, qui lingua sua non est lapsus, et qui non servívit indignis se. Allelúja. **V. Prov. 10, 31 et 12, 18** Lingua pravórum períbit: lingua autem sapiéntium est sánitas. Allelúja.

Extra Tempus Paschale

Graduale **Prov. 11, 13** Qui ámbulat fraudulénter, revélat arcána: qui autem fidélis est ánimi, celat. **V. Ps. 14, 1 et 3** Dómine, quis habitábit in tabernáculo tuo, aut quis requiescet in monte sancto tuo? Qui non egit dolum in lingua sua: nec fecit próximo suo malum.

Allelúja, allelúja. **V. Eccli. 25, 11** Beátus, qui lingua sua non est lapsus, et qui non servívit indignis se. Allelúja.

✠ Sequéntia sancti Evangéllii secúndum Matthæum

Matth. 11, 2-10

In illo témpore: Cum audisset Joánnes in vínclis ópera Christi, mittens duos de discípuis suis, ait illi: Tu es, qui ventúrus es, an álium expectámus? Et respóndens Jesus, ait illis: Eúntes renuntiáte Joánni, quæ audístis et vidístis. Cæci vident, claudi ámbulant, leprósi mundántur, surdi áudiunt, mórtui resúrgunt, páuperes evangelizántur: et beátus est, qui non fúerit scandalizátus in me. Illis autem abeúntibus, cœpit Jesus dicere ad turbas de Joánnē: Quid existís in desértum vidére? arúndinem vento agitátam? Sed quid existís vidére? hóminem móllibus vestítum? Ecce, qui móllibus vestiúntur, in dómibus regum sunt. Sed quid existís vidére? Prophétam? Etiam dico vobis, et plus quam Prophétam. Hic enim, de quo scriptum est: Ecce, ego mitto Angelum meum ante fáciem tuam, qui præparábit viam tuam ante te.

Offertorium Eccli. 42, 1 Non dúplices sermónem de revelatióne sermónis absconditi, et eris vere sine confusióne: et invénies grátiam in conspéctu ómnium hóminum, allelúja.

Secreta

Hæc tua, Dómine, sacra mystéria illum in nobis, quæsumus, ignem accéndant: quo ínclytus Martyr et Sacerdos tuus Joánnes, ea peragéndo, flagrábat. Per Dóminum nostrum.

Pro S. Ubaldo

Secreta

Sancti tui, quæsumus, Dómine, nos ubique lætíficent: ut, dum eórum mérita recólimus, patrocínia sentiámus. Per Dóminum nostrum.

Communio Is. 6, 6-7 Volávit ad me unus de Séraphim: et in manu ejus cál-

culus, quem túlerat de altári, et tétigit os meum, allelúja.

Postcommunio

Fragilitátem nostram, Dómine, cælestis hæc mensa fórtium pane confirmet: qui beáti Mártiris et Sacerdótis tui Joánnis tentátam contra honórem sacraménti constántiam, júgiter áluit ad victóriam. Per Dóminum nostrum.

Pro S. Ubaldo

Postcommunio

Præsta, quæsumus, omnipotens Deus: ut, de percéptis munéribus grátias exhibéntes, intercedénte beáto Ubáldo Confessóre tuo atque Pontífice, benefícia potióra sumámus. Per Dóminum.

Die 31 Maji

BEATÆ MARIE VIRGINIS
OMNIUM GRATIARUM MEDIATRICIS

Duplex majus

Introitus Hebr. 4, 16

Adeámus cum fidúcia ad thronum grátia, ut misericórdiam consequámur et grátiam inveníamus in auxílio opportúno. (T. P. Allelúja, allelúja.) **Ps. 120, 1** Levávi óculos meos in montes: unde véniet auxílium mihi.

V. Glória Patri.

Oratio

Dómine Jesu Christe, noster apud Patrem mediátor, qui beatíssimam Vírginem, Matrem tuam, matrem quoque nostram et apud te mediátricem constituére dignátus es: concéde propítius; ut, quisquis ad te benefícia petíturus accesserit, cuncta se per eam impetrásse lætétur: Qui vivis et regnas cum eódem Deo Patre.

Et fit Com. S. Angelæ Mericiæ Virg.:

Oratio

Deus, qui novum per beátam Angelam sacrárum Vírginum collégium in Ecclésia tua floréscere voluísti: da

nobis, ejus intercessióne, angélicis móribus vívere; ut, terrénis ómnibus abdicátis, gáudiis pérfrui mereámur ætérnis. (Per Dóminum nostrum.)

Deinde Com. S. Petronillæ Virg.:

Oratio

Exáudi nos, Deus, salutáris noster: ut, sicut de beátæ Petronillæ Virgínis tuæ festivitáte gaudémus; ita piæ devotiónis erudiámur afféctu. Per Dóminum nostrum.

Léctio Isaíæ Prophétæ

Is. 55, 1-3 et 5

Omnes sitiéntes, veníte ad aquas: et qui non habétis argéntum, properáte, émite et comédite: veníte, émite absque argénto et absque ulla commutatióne vinum et lac. Quare appénditis argéntum non in pánibus, et labórem vestrum non in saturitáte? Audíte audiéntes me, et comédite bonum, et delectábitur in crassitúdine ánima vestra. Inclínate aurem vestram, et veníte ad me: audíte, et vivet ánima vestra. Ecce, gentem, quam nesciébas, vocábis: et gentes, quæ te non cognóverunt, ad te current propter Dóminum, Deum tuum, et sanctum Israel, quia glorificávit te.

Graduale Eccli. 24, 25-26 In me grátia omnis viæ et veritátis, in me omnis spes vitæ et virtútis. **V.** Transíte ad me, omnes, qui concupíscitis me, et a generatióne meis implémini.

Allelúja, allelúja. **V.** Salve, Mater misericórdiæ, Mater spei et grátiae, o María. Allelúja.

Tempore autem Paschali omittitur Graduale, et ejus loco dicitur:

Allelúja, allelúja. **V. Is. 60, 4** Leva in circúitu óculos tuos, et vide: omnes isti congregáti sunt, venérunt tibi. Allelúja.

V. Fílii tui de longe vénient, et fíliæ tuæ de látere surgent. Allelúja.

✠ Sequéntia sancti Evangélii secúndum Joánnem

Joann. 19, 25-27

In illo témpore: Stabant juxta Crucem Jesu Mater ejus, et soror Matris ejus, María Cléophæ, et María Magdaléne. Cum vidisset ergo Jesus Matrem, et discípulum stantem, quem diligébat, dicit Matri suæ: Múlier, ecce filius tuus. Deínde dicit discípulo: Ecce Mater tua. Et ex illa hora accépit eam discípulus in sua.

Credo.

Offertorium Jer. 18, 20 Recordáre, Virgo Mater, in conspéctu Dei, ut loquáris pro nobis bona, et ut avértat indignatióne suam a nobis. (T. P. Allelúja.)

Secreta

Matris tuæ ac mediatrícis nostræ précibus, Dómine, quæsumus: hæc hostiárum oblátio nosmetípsos, tua grátia largiénte, tibi perficiat munus ætérnum: Qui vivis et regnas.

Pro S. Angela

Secreta

Hóstia, Dómine, quam tibi beátæ Angelæ memóriam recoléntes offérimus, et nostræ pravitátis véniam implóret, et grátiae tuæ nobis dona concíliet. (Per Dóminum nostrum.)

Pro S. Petronilla

Secreta

Accépta tibi sit, Dómine, sacrátæ plebis oblátio pro tuórum honóre Sanctórum: quorum se méritis de tribulatióne percepisse cognóscit auxiliúm. Per Dóminum nostrum.

Præfatio de B. Maria Virg. Et te in Festivitáte.

Communio Esth. 15, 17 Valde mirábilis es, o María, et fácies tua plena est gratiárum. (T. P. Allelúja.)

Postcommunio

Subvéniat nobis, Dómine, beátæ Maríæ, Matris tuæ ac nostræ mediátrícis, orátio: ut per hæc sacrosáncta comércia, tua grátia largiēnte, ad redemptiónis ætérnæ proficiámus augméntum: Qui vivis et regnas.

Pro S. Angela Postcommunio

Cælésti alimónia refécti, súpplices te, Dómine, deprecámur: ut, beátæ Angelæ précibus et exémplo ab omni labe mundáti, et córpore tibi placeámus et mente. (Per Dóminum.)

Pro S. Petronilla Postcommunio

Satiásti, Dómine, famíliam tuam munéribus sacris: ejus, quæsumus, semper interventióne nos réfove, cujus solémnia celebrámus. Per Dóminum.

Die 5 Junii

**S. BONIFATII
EPISCOPI ET MARTYRIS**

Duplex II classis

Missa ut in Missali hac die, mutato ritu.

Die 16 Junii

**S. BENNONIS
EPISCOPI ET CONFESSORIS**

Duplex majus

Missa Státuit, de Communi Confessoris Pontificis 1 loco, præter Orationes sequentes:

Oratio P

Deus, qui nos beáti Bennónis Pontíficis confessióne gloriósa circúmdas et prótegis: da nobis, et ejus imitatioe proficere, et intercessióne gaudere. Per Dóminum nostrum Jesum Christum, Fílium tuum: Qui tecum vivit et regnat.

Secreta P

Sanctus tuus, quæsumus, Dómine, Benno Conféssor et Póntifex nos ubíque lætíficet: ut, dum ejus recólimus mérita gloriósa, apud te semper patrónia sentiámus. Per Dóminum.

Postcommunio P

Quæsumus, Dómine, salutáribus repléti mystériis; ut sancti tui Bennónis Confessoris et Pontíficis, cujus solémnia celebrámus, étiam intercessióne adjuvémur. Per Dóminum nostrum Jesum Christum, Fílium tuum: Qui tecum vivit et regnat.

Die 22 Junii

SS. ACHATII ET SOCIORUM MM.

Commemoratio**Oratio**

Deus, qui nos concédís sanctórum Mátyrum tuórum Achátii et Sociórum ejus natalítia cólere: da nobis in ætérna beatitúdine de eórum societate gaudere. Per Dóminum nostrum.

Secreta

Múnere tibi, Dómine, nostræ devotiónis offerimus: quæ et pro tuórum tibi grata sint honóre Justórum, et nobis salutária, te miserante, redántur. Per Dóminum nostrum.

Postcommunio

Præsta nobis, quæsumus, Dómine: intercedéntibus sanctis Mátyribus tuis Achátio et Sóciis ejus; ut, quod ore contíngimus, pura mente capiámus. Per Dóminum nostrum Jesum Christum, Fílium tuum: Qui tecum vivit et regnat.

‡ **Sicubi de eis dicenda sit integra Missa, sumitur Missa Sapiéntiam, de Communi plurimorum Mátyrum 2 loco.**

Die 4 Julii
S. UDALRICI EP. ET CONF.

Duplex

Missa Sacerdótes tui, de Comuni Confessoris Pontificis 2 loco, præter Evangelium Homo pègre, de eodem Comuni 1 loco et cum Oratione sequenti:

Oratio

P

Deus, qui cónspicis, quia ex nulla nostra virtúte subsístimus: concéde propítius; ut intercessióne beáti Udalrici Confessoris tui atque Pontificis contra ómnia advèrsa muniámur. Per Dóminum nostrum.

Et fit Commemoratio Octavæ Ss. Petri et Pauli Apostolorum:

Oratio

Deus, qui hodiérnam diem Apostolorum tuórum Petri et Pauli martyrio consecrásti: da Ecclésiæ tuæ, eórum in ómnibus sequi præcéptum; per quos religiónis sumpsit exórdium. Per Dóminum nostrum.

Secreta

C

Sancti Udalrici Confessoris tui atque Pontificis, quæsumus, Dómine, ánnua solémnitas pietáti tuæ nos reddat accéptos: ut, per hæc piæ placatiónis officia, et illum beáta retribútio comitétur, et nobis grátia tuæ dona concíliet. Per Dóminum nostrum.

Pro Octava

Secreta

Hóstias, Dómine, quas nómini tuo sacrándas offérimus, apostólica prosequátur orátio: per quam nos expiári tribuas et deféndi. Per Dóminum.

Postcommunio

C

Deus, fidélium remunerátor animárum: præsta; ut beáti Udalrici Confessoris tui atque Pontificis, cuius

venerándam celebrámus festivitátem, précibus indulgéntiam consequámur. Per Dóminum nostrum.

Pro Octava

Postcommunio

Quos cælésti, Dómine, aliménto satiásti: apostólicis intercessiόνibus ab omni adversitaté custódi. Per Dóminum nostrum.

Die 9 Julii

S. WILLIBALDI
EPISCOPI ET CONFESSORIS

Duplex

Introitus

Gaudéamus omnes in Dómino, diem festum celebrántes sub honóre sancti Willibáldi, de cuius solémnitáte gaudent Angeli et colláudant Fílium Dei. **Ps. 91, 13 et 14** Justus ut palma florébit, sicut cedrus Líbani multiplicábitur in domo Dómini.

V. Glória Patri.

Oratio

Deus, qui gloriósum Pontíficem tuum Willibáldum, Anglórum regni herédem, hodiérna die ad ætérnam Angelórum hereditátem transtulisti: concéde propítius; ut ejus méritis et intercessióne coherédes ipsíus in tua glória esse mereámur. Per Dóminum nostrum.

Léctio Epístolæ beáti Pauli Apóstoli ad Hebræos

Hebr. 7, 23-27

Fratres: Plures facti sunt sacerdótes, idcirco quod morte prohiberéntur permanére: Jesus autem, eo quod máneat in ætérnum, sempitérnum habet sacerdotium. Unde et salváre in perpétuum potest accedéntes per semetípsum ad Deum: semper vivens ad interpellándum pro nobis. Talis enim decébat,

ut nobis esset pónifex, sanctus, innocens, impollútus, segregátus a peccatóribus, et excélsior cælis factus: qui non habet necessitátem quotidie, quemádmodum sacerdótes, prius pro suis delictis hóstias offerre, deínde pro pópuli: hoc enim fecit semel, seípsum offeréndo, Jesus Christus, Dóminus noster.

Graduale Ps. 131, 16-17 Sacerdótes ejus índuam salutári: et sancti ejus exsultatióne exsultábunt. **V.** Illuc prodúcam cornu David: parávi lucérnam Christo meo.

Allelúja, allelúja. **V. Ps. 109, 4** Jurávit Dóminus, et non pœnitébit eum: Tu es sacérdos in ætérnum, secúndum órđinem Melchisedech. Allelúja.

✠ Sequéntia sancti Evangéllii secúndum Matthæum

Matth. 19, 27-29

In illo témpore: Dixit Petrus ad Jesum: Ecce, nos relíquimus ómnia, et secúti sumus te: quid ergo erit nobis? Jesus autem dixit illis: Amen, dico vobis, quod vos, qui secúti estis me, in regeneratióne, cum séderit Fílius hóminis in sede majestátis suæ, sedébitis et vos super sedes duódecim, judicántes duódecim tribus Israel. Et omnis, qui relíquerit domum, vel fratres, aut soróres, aut patrem, aut matrem, aut uxórem, aut filios, aut agros, propter nomen meum, céntuplum accípiet, et vitam ætérnam possidébit.

Offertorium Ps. 88, 25 Véritas mea et misericórdia mea cum ipso: et in dómine meo exaltábitur cornu ejus.

Secreta

Hæc oblátio, Dómine Deus, nostri cordis óculos illústret: ut per beáti Willibáldi Confessóris tui atque Pontí-

ficus, cujus natalítia cólimus, mérita te veráciter agnoscámus, et æternáliter vidére mereámur. Per Dóminum.

Communio Matth. 24, 46-47 Beátus servus, quem, cum vénerit dóminus, invénerit vigilántem: amen, dico vobis, super ómnia bona sua constituet eum.

Postcommunio

Sumpta sacraménta nos, Dómine, sanctíficent: ut per intercessióne gloriósi Pontíficis tui Willibáldi, cujus hódie natalítia cólimus, ad gáudia vitæ cæléstis transíre valeámus. Per Dóminum nostrum.

Die 15 Julii

S. HENRICI

IMPERATORIS, CONFESSORIS

Duplex

Missa ut in Missali hac die, mutato ritu.

Die 17 Julii

B. IRMENGARDIS VIRGINIS

Duplex

Missa Dilexísti, de Comuni Virginum 3 loco, præter Orationes sequentes:

Oratio

P

Dómine Jesu, qui beátam Irmengárdem, Vírginem tuam, mundi delicias despícere et nómini tuo benedicere fecísti: præsta, quæsumus; ut ejus intercessióne ómnibus diébus vitæ nostræ tibi placeámus: Qui vivis et regnas.

Et fit Commemoratio S. Alexii Confessoris:

Oratio

Deus, qui nos beáti Alexii Confessoris tui ánnua solemnitate lætifícas: concéde propítius; ut, cujus natalítia cólimus, étiam actiões imitémur. Per Dóminum nostrum.

Secreta P

Benedictio tua, Dómine, larga descéndat, quæ, beátæ Vírginis Irmengárdis suffrágiis, múnera nostra tibi reddat accépta et nobis sacraméntum redemptiónis perficiat. Per Dóminum.

Pro S. Alexio **Secreta**

Laudis tibi, Dómine, hóstias immolámus in tuórum commemoratióne Sanctórum; quibus nos et præsentibus éxui malis confidimus et futúris. Per Dóminum nostrum.

Postcommunio P

Beátæ Irmengárdis précibus confísi: quæsumus, Dómine; ut per ea, quæ súmpsimus, æténa remédia capiámus. Per Dóminum nostrum Jesum Christum, Fílium tuum: Qui tecum vivit et regnat.

Pro S. Alexio **Postcommunio**

Refecti cibo potúque cælesti, Deus noster, te súpplices exorámus: ut, in cujus hæc commemoratióne percépiamus, ejus muniámur et précibus. Per Dóminum nostrum.

Die 27 Julii

**DEDICATIO
ECCLESIAE CATHEDRALIS****Duplex I classis cum Octava communi**

Missa Terríbilis, ut in Communi Dedicatiónis Ecclesiæ.

☞ **Infra Octavam de ea fit Commemoratio, juxta Rubricas.**

Die 30 Julii autem fit de ipsa Octava et dicitur Missa ut in Festo cum Commemoratione Ss. Abdon et Sennen Mm., ut in Missali eadem die, et 3^a Oratióne de sancta Maria Concéde.

Item in die Octava dicitur Missa ut in Festo sine Commemoratione.

Die 7 Augusti
S. AFRÆ MARTYRIS**Commemoratio****Oratio**

Deus, qui inter cetera poténtiæ tuæ mirácula étiam in sexu frágili victóriam martýrii contulísti: concéde propítius; ut, qui beátæ Afræ Mártyris tuæ natalítia cólimus, per ejus ad te exémp-la gradiámur. Per Dóminum nostrum.

Secreta

Súscipe, Dómine, múnera, quæ in beátæ Afræ Mártyris tuæ solemnitate deférimus: cujus nos confidimus patrocínio liberári. Per Dóminum.

Postcommunio

Auxiliéntur nobis, Dómine, sumpta mystéria: et, intercedénte beáta Afræ Mártyre tua, sempitérna faciánt protectiõe gaudére. Per Dóminum.

☞ **Sicubi de ea dicenda sit integra Missa, sumitur Missa Me expectavérunt, de Communi non Virginum 1 loco.**

Die 8 Augusti

***S. ALTMANNI
EPISCOPI ET CONFESSORIS****Duplex majus**

Missa Státuit, de Communi Conf. Pont. 1 loco, præter sequentia:

Oratio P

Deus, qui ad Ecclesiæ tuæ libertátem et decórem promovéndum sanctum Altmánnum Confessórem tuum atque Pontíficem ánimi fortitúdine roborásti: ejus intercessiõe concéde; ut advérsa ómnia superántes in terris, coronári cum ipso mereámur in cælis. Per Dóminum nostrum Jesum Christum, Fílium tuum: Qui tecum vivit et regnat.

Et fit Commemoratio Ss. Cyriaci, Largi et Smaragdi Mm.:

Oratio

Deus, qui nos ánnua sanctorum Márturum tuorum Cyríaci, Largi et Smaragdi solemnitate lætificas: concéde propítius; ut, quorum natalítia cólimus, virtútem quoque passiónis imitémur. Per Dóminum nostrum.

Evangelium Vigiláte, ut in eodem Comuni 2 loco.

Secreta

C

Sancti tui, quæsumus, Dómine, nos ubique lætificent: ut, dum eorum mérita recólimus, patrocfnia sentiámus. Per Dóminum nostrum.

Pro Ss. Martyribus

Secreta

Accépta sit in conspéctu tuo, Dómine, nostra devótio: et eorum nobis fiat supplicatióne salutáris, pro quorum solemnitate defértur. Per Dóminum.

Postcommunio

C

Præsta, quæsumus, omnipotens Deus: ut, de percéptis munéribus grátias exhibéntes, intercedénte beáto Altmáno Confessóre tuo atque Pontífice, beneficia potióra sumámus. Per Dóminum.

Pro Ss. Martyribus **Postcommunio**

Refécti participatióne múnere sacri, quæsumus, Dómine, Deus noster: ut, cujus exséquimur cultum, intercedéntibus sanctis Mártýribus tuis Cyríaco, Largo et Smaragdo, sentiámus efféctum. Per Dóminum nostrum.

Die 11 Augusti

TRANSLATIO S. VALENTINI
EPISCOPI ET CONFESSORIS

Duplex majus

Missa ut die 7 Januarii 1*.

Et fit Com. Ss. Tiburtii et Susannæ Virg., Mm., ut in Missali hac die.

Die 13 Augusti

SS. XYSTI, FELICISSIMI ET AGAPITI
MARTYRUM

Duplex

Missa Sapiéntiam, de Comuni plurimorum Martyrum 2 loco.

In Ecclesia Cathedrali dicitur Credo, ratione reliquiæ insignis.

Et fit Commemoratio Ss. Hippolyti et Cassiani Mm., ut in Missali hac die.

Die 14 Augusti

IN INVENTIONE S. STEPHANI
PROTOMARTYRIS

Duplex majus

Missa ut in Missali die 3 Augusti.

Et fit Commemoratio Vigiliæ Assumptiõnis B. Mariæ Virg. et S. Eusebii Conf., ut in Missali hac die, ac legitur Evangelium Vigiliæ in fine.

In Ecclesiis S. Stephano dedicatis et in Civitate episcopali dicitur Credo.

Die 4 Septembris

S. ROSALÆ VIRGINIS

Duplex

Missa Dilexisti, de Comuni Virginum 3 loco, præter Orationem sequentem:

Oratio

P

Exáudi nos, Deus, salutáris noster: ut, sicut de beátæ Rosaliæ Virginis tuæ festivitáte gaudémus, ita piæ devotiõnis erudiámur afféctu; et ejus intercessiõne ab iracúndiæ tuæ flagéllis misericórditer liberémur. Per Dóminum.

Secreta

C

Accépta tibi sit, Dómine, sacrátæ plebis oblátio pro tuorum honóre Sanctorum: quorum se méritis de tribulatióne percepisse cognóscit auxiliium. Per Dóminum nostrum.

Postcommunio C

Satiásti, Dómine, familiam tuam munéribus sacris: ejus, quæsumus, semper interventióne nos réfove, cujus solémnia celebrámus. Per Dóminum.

Die 9 Septembris
S. CORBINIANI
EPISCOPI ET CONFESSORIS

Duplex

Missa Státuit, de Communi Confessoris Pontificis 1 loco, præter Orationem sequentem:

Oratio P

Deus, qui nos beáti Corbiniáni Confessoris tui atque Pontíficis prædicatione et miraculis ad agnitióem tui nóminis vocáre dignátus es: concéde propítius; ut, cujus solémnia cólimus, étiam patrocínia sentiámus. Per Dóminum nostrum.

Et fit Com. S. Gorgonii Mart.:

Oratio

Sanctus tuus, Dómine, Gorgónius sua nos intercessióne lætíficet: et pia fáciat solemnitate gaudére. Per Dóminum nostrum.

Secreta C

Sancti tui, quæsumus, Dómine, nos subique lætíficent: ut, dum eórum mérita recólimus, patrocínia sentiámus. Per Dóminum nostrum.

Pro S. Gorgonio **Secreta**

Grata tibi sit, Dómine, nostræ servitútis oblátio: pro qua sanctus Gorgónius Martyr intervéntor exsístat. Per Dóminum nostrum.

Postcommunio C

Præsta, quæsumus, omnipotens Deus: ut, de percéptis munéribus grátias exhibéntes, intercedénte beáto Corbiniáno Confessóre tuo atque Pontífice, benefícia potióra sumámus. Per Dóminum.

Pro S. Gorgonio **Postcommunio**

Familiam tuam, Deus, suávitatis ætérna contíngat et végetet: quæ in Mártire tuo Gorgónio Christi, Fílii tui, bono júgiter odóre pascátur: Qui tecum vivit et regnat.

Die 13 Septembris
B. NOTHBURGÆ VIRGINIS

Duplex

Missa Dilexísti, de Communi Virginum 3 loco, præter Orationes sequentes:

Oratio P

Præténde, Dómine, fidélibus tuis dexteram cæléstis auxilií: ut, méritis et exémplo beátæ Nothbúrgæ Virgínis, te toto corde perquírant; et, quæ digne póstulant, cónsequi mereántur. Per Dóminum nostrum.

Secreta P

Cæléstem nobis præbeant hæc mystéria, quæsumus, Dómine, medicínam: et, intercedénte beáta Nothbúrga Virgine tua, vítia nostri cordis expúrgent. Per Dóminum nostrum.

Postcommunio P

Auxiliéntur nobis, Dómine, sumpta mystéria: et, intercedénte beáta Nothbúrga Virgine tua, sempitérna protectióne cónfirmet. Per Dóminum.

Die 17 Septembris
S. HILDEGARDIS VIRGINIS

Duplex**Introitus Ps. 72, 28**

Mihi autem adhærere Deo bonum est, pónere in Dómino spem meam: ut annúntiem omnes prædicationes tuas in portis filíæ Sion. **Ps. 40, 13** Me autem propter innocentiam suscepísti: et confirmásti me in conspéctu tuo in ætérnum.

V. Glória Patri.

Oratio

Deus, qui beátam Hildegárdem Virginem tuam donis cæléstibus decorásti: tríbue, quæsumus; ut, ejus vestígiis et documéntis insistentes, a præséntis sæculi calígine ad lucem tuam delectábilem transíre mereámur. Per Dóminum nostrum.

Et fit Com. Impressionis Ss. Stigmatum S. Francisci Conf.:

Oratio

Dómine Jesu Christe, qui, frigescén-
te mundo, ad inflammándum cor-
da nostra tui amóris igne, in carne bea-
tíssimi Francisci passiónis tuæ sacra
Stigmata renovásti: concéde propítius;
ut ejus méritis et précibus crucem júgi-
ter ferámus, et dignos fructus pœnitén-
tiæ faciámus: Qui vivis et regnas.

Léctio Epístolæ beáti Pauli Apóstoli ad
Corínthios **1 Cor. 1, 26-29**

Vidéte vocatióem vestram, fratres,
quia non multi sapiéntes secún-
dum carnem, non multi poténtes, non
multi nóbiles: sed quæ stulta sunt mun-
di elégit Deus, ut confúndat sapiéntes:
et infírma mundi elégit Deus, ut confún-
dat fórtia: et ignobília mundi et cón-
temptibília elégit Deus, et ea quæ non
sunt, ut ea quæ sunt destrúeret: ut non
gloriétur omnis caro in conspéctu ejus.

Graduale Cantic. 3, 4 et 6, 2 Invéni
quem díligit ánima mea: ténui eum, nec
dimittam. **V.** Ego dilécto meo, et diléc-
tus meus mihi, qui páscitur inter lília.

Allelúja, allelúja. **V. Isai. 61, 10** Ex-
sultábit ánima mea in Deo meo, quia
índuit me vestiméntis salútis, quasi
sponsam ornátam monílibus suis. Alle-
lúja.

**In Missis votivis post Septuagesimam,
omissis Allelúja et Versu sequenti, di-
citur**

Tractus Sap. 4, 1-3 O quam pulchra
est casta generatio cum claritate: im-
mortalis est enim memoria illius, quón-
iam et apud Deum nota est, et apud hó-
mines. **V.** Cum præsens est, imitantur
illam, et desíderant eam, cum se edúxe-
rit. **V.** Et in perpétuum coronata tri-
úmphant, incoínquatorum certáminum
præmia vincens.

**Tempore Paschali omittitur Graduale,
et ejus loco dicitur:**

Allelúja, allelúja. **V. Ps. 30, 22** Bene-
dícetus Dóminus: quóniam mirificávit
misericórdiam suam mihi in civitate
muníta. Allelúja. **V. Prov. 4, 9** Lætáre,
mater nostra, quia dabit Dóminus cá-
piti tuo augménta gratiárum, et coroná
ínclýta próteget te. Allelúja.

✠ Sequéntia sancti Evangélii secún-
dum Matthæum

Matth. 25, 1-13

In illo témpore: Dixit Jesus discípulis
suis parábolam hanc: Símile erit reg-
num cælórum decem virgínibus: quæ,
accipiéntes lámpades suas, exiérunt ób-
viam sponso et sponsæ. Quinque au-
tem ex eis erant fátuæ, et quinque pru-
déntes: sed quinque fátuæ, accéptis lam-
pádibus, non sumpsérunt óleum secum:
prudéntes vero accepérunt óleum in va-
sis suis cum lámpádibus. Moram autem
faciénte sponso, dormitavérunt omnes
et dormiérunt. Média autem nocte cla-
mor factus est: Ecce, sponsus venit, ex-
íte óbviam ei. Tunc surrexérunt omnes
virgines illæ, et ornavérunt lámpades
suas. Fátuæ autem sapiéntibus dixé-
runt: Date nobis de óleo vestro: quia
lámpades nostræ exstinguúntur. Re-
spondérunt prudéntes, dicéntes: Ne for-
te non suffíciat nobis et vobis, ite pótius
ad vendéntes, et émite vobis. Dum au-
tem irent émere, venit sponsus: et quæ

parátæ erant, intravérunt cum eo ad nuptias, et clausa est jánuæ. Novissime vero véniunt et réliquæ vírgines, dicentes: Dómine, Dómine, áperi nobis. At ille respóndens, ait: Amen, dico vobis, nescio vos. Vigiláte itaque, quia nescitis diem neque horam.

Offertorium Ps. 41, 2 et 3 Quemádmódum desiderat cervus ad fontes aquárum, ita desíderat ánima mea ad te, Deus. Sitívit ánima mea ad Deum fortem vivum.

Secreta

Sanctæ Hildegárdis Vírginis tuæ festa recoléntes, preces offérimus et hóstias immolámus: præsta, quæsumus, Dómine; ut, cum præsidio temporáli, vitæ nobis præbeant increménta perpétuæ. Per Dóminum nostrum.

Pro Impressione Ss. Stigmatum S. Francisci

Secreta

Múnera tibi, Dómine, dicáta sanctífica: et, intercedénte beáto Francisco, ab omni nos culpárum labe purifica. Per Dóminum nostrum.

Communio Philipp. 1, 20 et 21 Magnificábitur Christus in córpore meo, sive per vitam, sive per mortem: mihi enim vivere Christus est, et mori lucrum.

Postcommunio

Perpétuo, Dómine, favóre proséquare, quos réficis divíno mystério: et quos imbuísti cælestibus institútis; eosdem, intercedénte beáta Hildegárde Vírgine tua, salutáribus comítare solátiis. Per Dóminum nostrum.

Pro Impressione Ss. Stigmatum S. Francisci

Postcommunio

Deus, qui mira Crucis mystéria in beáto Francisco Confessóre tuo multifórmiter demonstrásti: da nobis, quæsumus; devotiónis suæ semper exéempla sectári, et assídua ejúsdem Crucis meditatióne muníri. Per Dóminum.

Die 9 Octobris

* S. GUNTHERI EREMITÆ

Semiduplex

Missa Os justi, de Communi Confessoris non Pontificis 1 loco, cum Evangelio Nolíte timére, de eodem Communi 2 loco.

Et fit Commemoratio Ss. Dionysii Ep., Rustici et Eleutherii Mm., ut in Missali hac die.

Die 12 Octobris

S. MAXIMILIANI EP. ET MART.

Dieceeses Patroni

Duplex I classis cum Octava communi

Introitus Dan. 3, 84 et 87

Sacerdótes Dei, benedicite Dóminum: sancti et húmiles corde, laudáte Deum. **Ibid., 57** Benedicite, ómnia ópera Dómini, Dómino: laudáte et superexaltáte eum in sácula.

V. Glória Patri.

Oratio

Deus, qui nos beáti Maximiliáni Mátyris tui atque Pontificis ánna solemnitate lætíficas: concéde propítius; ut, cujus natalítia cólimus, de ejúsdem étiam protectiόne gaudeámus. Per Dóminum nostrum.

Lectio Epístolæ beáti Pauli Apóstoli ad Corínthios

2 Cor. 1, 3-7

Fratres: Benedictus Deus et Pater Dómini nostri Jesu Christi, Pater misericordiárum, et Deus totíus consolatiónis, qui consolátur nos in omni tribulatióne nostra: ut possímus et ipsi consolári eos, qui in omni pressúra sunt, per exhortatiónem, qua exhortámur et ipsi a Deo. Quóniam sicut abúndant passiónes Christi in nobis: ita et per Christum abúndat consolátio nostra. Sive autem tribulámur pro vestra exhor-

tatióne et salúte, sive consolámur pro vestra consolatióne, sive exhortámur pro vestra exhortatióne et salúte, quæ operátur tolerántiam earúndem passiónum, quas et nos pátimur: ut spes nostra firma sit pro vobis: sciéntes, quod, sicut sócii passiónum estis, sic éritis et consolatiónis: in Christo Jesu, Dómino nostro.

Graduale Ps. 8, 6-7 Glória et honóre coronásti eum. **V.** Et constituísti eum super ópera mánuum tuárum, Dómine.

Allelúja, allelúja. **V.** Hic est Sacérdos, quem coronávit Dóminus. Allelúja.

✠ Sequéntia sancti Evangélii secúndum Lucam **Luc. 14, 26-33**

In illo témpore: Dixit Jesus turbis: Si quis venit ad me, et non odit patrem suum, et matrem, et uxórem, et fílios, et fratres, et soróres, adhuc autem et ánimam suam, non potest meus esse discipulus. Et qui non hájulat crucem suam, et venit post me, non potest meus esse discipulus. Quis enim ex vobis volens turrim aedificáre, non prius sedens cómputat sumptus, qui necessárii sunt, si hábeat ad perficiéndum; ne, posteáquam posúerit fundaméntum, et non potúerit perficere, omnes, qui vident, incípiant illúdere ei, dicéntes: Quia hic homo cœpit aedificáre, et non pótuít consummáre? Aut quis rex itúrus commíttere bellum advérsus álium regem, non sedens prius cógitat, si possit cum decem millibus occúrrere ei, qui cum vigínti millibus venit ad se? Alióquin, adhuc illo longe agénte, legatiónem mittens, rogat ea, quæ pacis sunt. Sic ergo omnis ex vobis, qui non renúntiat ómnibus, quæ póssidet, non potest meus esse discipulus.

Credo, per totam Octavam.

Offertorium Ps. 88, 21-22 Invéni David servum meum, óleo sancto meo

unxi eum: manus enim mea auxiliábitur ei, et bráchium meum confortábit eum.

Secreta

Múnera tibi, Dómine, dicáta sanctífica: et, intercedénte beáto Maximiliáno Mártire tuo atque Pontífice, per éadem nos placátus inténde. Per Dóminum nostrum.

Communio Ps. 20, 4 Posuísti, Dómine, in cápíte ejus corónam de lápide pretiósio.

Postcommunio

Hæc nos commúnio, Dómine, purget a crímine: et, intercedénte beáto Maximiliáno Mártire tuo atque Pontífice, cæléstis remédií fáciat esse cósortes. Per Dóminum nostrum.

¶ **Intra Octavam, excepta die 18 Octobris, de ea fit Commemoratio, juxta Rubricas.**

In die Octava autem Missa dicitur ut in Festo cum Commemoratione S. Petri de Alcantara Conf., ut in Missali eadem die.

Die 22 Octobris

In Ecclesiis consecratis, excepta Cathedrali:

IN DEDICATIONE ECCLESIAE PROPRIÆ

Duplex I classis cum Octava communi

Missa Terribilis, ut in Communi Dedicatiónis Ecclesiæ.

¶ **Die 24 Octobris fit Commemoratio Octavæ, juxta Rubricas. Diebus 23, 25, 26 et 27 autem fit de ipsa Octava et dicitur Missa ut in Festo cum Commemoratione Simplicis occurrentis et 3ª Oratione de sancta Maria Concède, die 23 autem cum 2ª Oratione de sancta Maria et 3ª contra persecutores Ecclesiæ vel pro Papa.**

In die Octava vero Missa dicitur ut in Festo.

Die 31 Octobris
S. WOLFGANGI
EPISCOPI ET CONFESSORIS

Duplex

Missa Sacerdotes tui, de Comuni
Conf. Pont. 2 loco, præter Orationem
sequentem:

Oratio

Deus, qui nobis æternæ salutis be-
atum Wolfgangum Episcopum mi-
nistrum tribuisti: præsta, quæsumus;
ut, quem doctorem vitæ habuimus in
terris, intercessorem habere mereamur
in cælis. Per Dñm nostrum.

Et, in Missis non conventualibus, fit
Commemoratio Vigiliæ Omnium Sanc-
torum, ut in Missali hac die, et de ea legi-
tur Evangelium in fine.

Secreta

Sancti Wolfgangi Confessoris tui at-
que Pontificis, quæsumus, Dñmine,
annua sollemnitas pietati tuæ nos red-
dat acceptos: ut, per hæc piæ placati-
onis officia, et illum beata retributio comi-
tetur, et nobis gratiæ tuæ dona con-
ciliet. Per Dñm nostrum.

Postcommunio

Deus, fideliū remunerator animã-
rum: præsta; ut beati Wolfgangi
Confessoris tui atque Pontificis, cujus
venerandam celebramus festivitatem,
præcibus indulgentiam consequamur.
Per Dñm nostrum.

Die 5 Novembris

SACRARUM RELIQUIARUM

quæ in Ecclesiis dioceseos asservantur

Duplex

Introitus Ps. 33, 20-21

Multæ tribulationes justorum, et de
his omnibus liberavit eos Dñ-
mus: Dñmus custodit omnia
ossa eorum: unum ex his non contere-

tur. Ps. *ibid.*, 2 Benedicam Dñm
in omni tempore: semper laus ejus in
ore meo.

V. Glória Patri.

Oratio

Propitiare, quæsumus, Dñmine, nobis
fámulis tuis, per Sanctorum tu-
orum, quorum hic habentur reliquiæ, et
patrocínia veneramur, mérita gloriósa:
ut eorum pia intercessióne, ab ómnibus
semper protegámur advérsis. Per Dñ-
m nostrum Jesum Christum, Fílium
tuum: Qui tecum vivit et regnat.

Et fit Commemoratio Octavæ Omnium
Sanctorum:

Oratio

Omnípotens sempitérne Deus, qui
nos ómnium Sanctorum tuorum
mérita sub una tribuisti celebritate ve-
nerári: quæsumus; ut desideratam no-
bis tuæ propitiatiónis abundantiam,
multiplicatis intercessóribus, largiáris.
Per Dñm nostrum.

Léctio libri Sapiéntiæ

Sap. 3, 1-8

Justorum animæ in manu Dei sunt, et
non tanget illos tormentum mortis.
Visi sunt oculis insipientium mori: et
æstimata est afflictio éxitus illorum: et
quod a nobis est iter, exterminium: illi
autem sunt in pace. Et si coram homini-
bus tormenta passi sunt, spes illorum
immortalitate plena est. In paucis ve-
xati, in multis bene disponuntur: quon-
iam Deus tentavit eos, et invenit illos
dignos se. Tamquam aurum in fornace
probavit illos, et quasi holocausti ho-
stiam accepit illos, et in tempore erit
respectus illorum. Fulgebunt justi, et
tamquam scintillæ in arundinato dis-
currunt. Judicabunt nationes, et domi-
nabuntur populis, et regnabit Dñmus
illorum in perpetuum.

Graduale Exodi 15, 11 Gloriosus Deus in Sanctis suis: mirabilis in majestate, faciens prodigia. **V. Ibid., 6** Dextera tua, Domine, glorificata est in virtute: dextera manus tua confrégit inimicos.

Allelúja, allelúja. **V. Eccli. 44, 14** Corpora Sanctorum in pace sepulta sunt, et nomina eorum vivent in generationem et generationem. Allelúja.

✠ Sequentia sancti Evangelii secundum Matthaeum

Matth. 5, 1-12

In illo tempore: Videns Jesus turbas, ascendit in montem, et cum sedisset, accesserunt ad eum discipuli ejus, et aperiens os suum, docebat eos, dicens: Beati pauperes spiritu: quoniam ipsorum est regnum caelorum. Beati mites: quoniam ipsi possidebunt terram. Beati, qui lugent: quoniam ipsi consolabuntur. Beati, qui esuriunt et sitiunt justitiam: quoniam ipsi saturabuntur. Beati misericordes: quoniam ipsi misericordiam consequentur. Beati mundo corde: quoniam ipsi Deum videbunt. Beati pacifici: quoniam filii Dei vocabuntur. Beati, qui persecutiónem patiuntur propter justitiam: quoniam ipsorum est regnum caelorum. Beati estis, cum maledixerint vobis, et persecuti vos fuerint, et dixerint omne malum adversum vos, mentientes, propter me: gaudete et exultate, quoniam merces vestra copiosa est in caelis. **Credo.**

Offertorium Ps. 67, 36 Mirabilis Deus in Sanctis suis: Deus Israel, ipse dabit virtutem et fortitudinem plebi suae: benedictus Deus, allelúja.

Secreta

Adesto, Domine, supplicationibus nostris, quas in Sanctorum tuorum commemoratióne deférimus: ut, qui nostrae justitiae fiduciam non habemus,

eorum, qui tibi placuerunt, méritis adjuvemur. Per Dóminum nostrum.

Pro Octava

Secreta

Múnera tibi, Domine, nostrae devoti6nis offerimus: quae et pro cunctorum tibi grata sint honoré Justorum, et nobis salutaria, te miserante, redantur. Per Dóminum nostrum.

Communio Sap. 3, 1, 2 et 3 Justorum animae in manu Dei sunt, et non tanget illos tormentum malitiae: visi sunt oculis insipientium mori: illi autem sunt in pace.

Postcommunio

Quæsumus, Domine, salutari6bus repléti mysteriis: ut, quorum solémnia celebramus, eorum orati6nibus adjuvemur. Per Dóminum nostrum.

Pro Octava

Postcommunio

Da, quæsumus, Domine, fidelibus populis ómnium Sanctorum semper venerati6ne lætari: et eorum perpétua supplicati6ne muniri. Per Dóminum.

Die 6 Novembris

S. LEONARDI ABBATIS

Duplex

Missa Os justi, de Communi Abbatum. Et fit Commemorati6 Octavae Omnium Sanctorum.

Die 13 Novembris

S. STANISLAI KOSTKÆ
CONFESSORIS

Duplex

Introitus Sap. 4, 13-14

Consummatus in brevi explévit tempora multa: placita enim erat Deo ánima illius: propter hoc properavit educere illum de médio iniquitatum. **Ps. 112, 1** Laudate, púeri, Dóminum: laudate nomen Dómini.

V. Glória Patri.

Oratio

Deus, qui inter cétera sapiéntiæ tuæ miracula étiam in ténera ætáte matúræ sanctitátis grátiam contulísti: da, quæsumus; ut, beáti Stanislái exémplo tempus instánter operándo rediméntes, in ætérnam íngredi réquiem festinémus. Per Dóminum nostrum.

Et fit Commemoratio S. Didaci Conf.:

Oratio

Omnípotens sempitérne Deus, qui dispositióne mirábili infirma mundi éligis, ut fórtia quæque confúndas: concéde propítius humilitáti nostræ; ut, piis beáti Dídaci Confessoris tui précibus, ad perénnem in cælis glóriam sublimári mereámur. Per Dóminum.

Léctio libri Sapiéntiæ

Sap. 4, 7-16

Iustus, si morte præoccupátus fúerit, in refrigério erit. Senéctus enim venerábilis est non diutúrna, neque anórum número computáta: cani autem sunt sensus hóminis, et ætas senectútis vita immaculáta. Placens Deo factus est diléctus, et vivens inter peccatóres translátus est. Raptus est, ne malítia mutáret intelléctum ejus, aut ne fictio decíperet ánimam illíus. Fascinatio enim nugacitátis obscúrat bona, et inconstántia concupiscéntiæ transvértit sensum sine malítia. Consummátus in brevi explévit témpora multa: plácita enim erat Deo ánima illíus: propter hoc properávit educere illum de médio iniquitátum: pópuli autem vidéntes, et non intelligéntes, non ponéntes in præcórdiis tália: quóniam grátia Dei, et misericórdia est in sanctos ejus, et respéctus in eléctos illíus. Condémnat autem justus mórtuus vivos ímpios, et juven-tus celérius consummáta longam vitam injústi.

Graduale Ps. 20, 3-4 Desidérium cordis ejus tribuísti ei: et voluntáte labiórum ejus non fraudásti eum. **V.** Quóniam prævenísti eum in benedictiónibus dulcédinis.

Allelúja, allelúja. **V. Ps. 118, 152** Inítio cognóvi de testimóniis tuis, quia in ætérnum fundásti ea. Allelúja.

† Sequéntia sancti Evangélii secúndum Matthæum

Matth. 19, 13-21

In illo témpore: Obláti sunt Jesu párvuli, ut manus eis impóneret et oráret. Discípuli autem increpábant eos. Jesus vero ait eis: Símite párvulos, et nolíte eos prohibére ad me veníre: tálium est enim regnum cælórum. Et cum imposuísset eis manus, ábiit inde. Et ecce, unus accédens, ait illi: Magister bone, quid boni fáciam, ut hábeam vitam ætérnam? Qui dixit ei: Quid me intérogas de bono? Unus est bonus, Deus. Si autem vis ad vitam íngredi, serva mandáta. Dicit illi: Quæ? Jesus autem dixit: Non homicídium fácies: Non adulterábis: Non fácies furtum: Non falsum testimónium dices: Honóra patrem tuum et matrem tuam, et díliges próximum tuum sicut te ipsum. Dicit illi adoléscens: Omnia hæc custodívi a juventúte mea: quid adhuc mihi deest? Ait illi Jesus: Si vis perféctus esse, vade, vende, quæ habes, et da paupéribus, et habébis thesáurum in cælo: et veni, séquere me.

Offertorium Ps. 42, 4 Introibo ad altáre Dei: ad Deum, qui lætificat juventútem meam.

Secreta

Angelórum pane, quæsumus, Dómine, beáti Stanislái nos intercéssio dignos efficiat, qui eo mérui angélica manu recreári. Per Dóminum nostrum.

Pro S. Didaco

Secreta

Præsta nobis, quæsumus, omnipotens Deus: ut nostræ humilitatis oblatio et pro tuorum tibi grata sit honore Sanctorum, et nos corpore pariter et mente purificet. Per Dominum nostrum.

Communio Eccli. 15, 3 Cibavit illum Dominus pane vitæ et intellectus, et aqua sapientiae salutaris potavit illum.

Postcommunio

Ut nobis, Domine, cælestis, quem sumpsimus, panis sit vitæ: beato Stanislao Confessore tuo intercedente, quæsumus; ut panis sit intellectus, et potus aqua sapientiae salutaris. Per Dominum nostrum.

Pro S. Didaco

Postcommunio

Quæsumus, omnipotens Deus: ut, qui cælestia alimenta percipimus, intercedente beato Didaco Confessore tuo, per hæc contra omnia adversa muniamur. Per Dominum nostrum.

Die 26 Novembris
S. JOANNIS BERCHMANS
CONFESSORIS

Duplex

Introitus Ps. 118, 167

Custodivit anima mea testimonia tua, Domine: et dilexit ea vehementer. **Ps. ibid., 1** Beati immaculati in via: qui ambulat in lege Domini. **V.** Gloria Patri.

Oratio

Concède, quæsumus, famulis tuis, Domine Deus: ea innocentiae ac fidelitatis exempla in tuo servitio sectari; quibus angelicus juvenis Joannes ætatis suæ florem consecravit. Per Dominum nostrum.

Et fit Com. S. Silvestri Abbatis:

Oratio

Clementissime Deus, qui sanctum Silvestrum Abbatem, sæculi hujus vanitatem in aperto tumulo pie meditantem, ad eremum vocare et præclaris vitæ meritis decorare dignatus es: te supplices exoramus; ut, ejus exemplo terrena despicientes, tui consortio perfruamur æterno. (Per Dominum.)

Deinde Commemoratio S. Petri Alexandrini Ep. et Mart.:

Oratio

Infirmi-tatem nostram respice, omnipotens Deus: et, quia pondus propriae actionis gravat, beati Petri Martyris tui atque Pontificis intercessio gloriosa nos protegat. Per Dominum nostrum.

Lectio libri Sapientiae

Eccli. 51, 17-25, 27-28 et 35

Confitebor et laudem dicam tibi, Domine Rex, et benedicam nomini Domini. Cum adhuc junior essem, priusquam oberrarem, quæsi sapiëntiam palam in oratione mea. Ante templum postulabam pro illa, et usque in novissimis inquiram eam. Et effloruit tamquam præcox uva: lætatum est cor meum in ea. Ambulavit pes meus iter rectum, a juventute mea investigabam eam. Inclina vi modice aurem meam, et excipi illam. Multam inveni in meipso sapiëntiam, et multum profeci in ea. Danti mihi sapiëntiam dabo gloriã. Consiliatus sum enim, ut facerem illam: zelatus sum bonum, et non confundar. Colluctata est anima mea in illa, et in faciendo eam confirmatus sum. Animam meam direxi ad illam, et in agnitione inveni eam. Possedi cum ipsa cor ab infitio: propter hoc non derelinquar. Videte oculis vestris, quia modicum laboravi, et inveni mihi multam requiem.

Die 17 Novembris

S. LEOPOLDI

MARCHIONIS, CONF.

Duplex

Introitus Ps. 36, 30-31

OS justi meditabitur sapiéntiam, et lingua ejus loquétur judícium: lex Dei ejus in corde ipsúus. Ps. *ibid.*, 1 Noli æmulári in malignántibus: neque zeláveris faciéntes iniquitátem.

V. Glória Patri.

Oratio

Deus, qui beátum Leopóldum a sæculi curis ad cæléstem glóriam traduxísti: concéde, quæsumus; ita nos per hæc temporália pertransíre, ut æternæ vitæ consórtia mereámur. Per Dóminum nostrum.

Et fit Commemoratio S. Gregorii Thaumaturgi Ep. et Conf.:

Oratio

Da, quæsumus, omnipotens Deus: ut beáti Gregórii Confessóris tui atque Pontíficis veneránda sollémnitas, et devotióne nobis áugeat et salútem. Per Dóminum nostrum.

Lectio libri Sapiéntiæ

Eccli. 31, 8-11

Beátus vir, qui invéntus est sine mácula, et qui post aurum non ábiit, nec sperávit in pecúnia et thesáuris. Quis est hic, et laudábimus eum? fecit enim mirabilia in vita sua. Qui probá-

tus est in illo, et perféctus est, erit illi glória æténa: qui pótuit tránsgrédi, et non est tránsgréssus: fácere mala, et non fecit: ideo stabilita sunt bona illius in Dómino, et elemósynas illius enarrábit omnis ecclésia sanctórum.

Graduale Ps. 91, 13 et 14

Justus ut palma florébit: sicut cedrus Líbani multiplicábitur in domo Dómini.

V. *Ibid.*, 3 Ad annuntiándum mane misericórdiam tuam, et veritátem tuam per noctem.

Allelúja, allelúja. V. Jac. 1, 12 Beátus vir, qui suffert tentatióne: quóniam, cum probátus fúerit, accípiet corónam vitæ. Allelúja.



Sequéntia sancti Evangélii
secúndum Lucam

Luc. 19, 12-26

In illo témpore: Dixit Jesus discípulis suis parábolam hanc: Homo quidam nóbilis ábiit in regióne longínquam accíperé sibi regnum, et revérti. Vocáti autem decem servis suis, dedit eis decem mnas, et ait ad illos: Negotiámini, dum vénio. Cives autem ejus óderant eum: et misérunt legatióne post illum, dicéntes: Nólumus hunc regnáre super nos. Et factum est, ut redíret accépto regno: et jussit vocári servos, quibus dedit pecúniám, ut sciret, quantum quis-

que negotiátus esset. Venit autem primus, dicens: Dómine, mna tua decem mnas acquisívit. Et ait illi: Euge, bone serve, quia in módico fuisti fidélis, eris potestátem habens super decem civitátes. Et alter venit, dicens: Dómine, mna tua fecit quinque mnas. Et huic ait: Et tu esto super quinque civitátes. Et alter venit, dicens: Dómine, ecce mna tua, quam hábui repósitam in sudário: tímui enim te, quia homo austérus es: tollis, quod non posuísti, et metis quod non seminásti. Dicit ei: De ore tuo te júdico, serve nequam. Sciébas, quod ego homo austérus sum, tollens, quod non pósui, et metens, quod non seminávi: et quare non dedísti pecúniám meam ad mensam, ut ego véniens cum usúris útique exegíssem illam? Et astántibus dixit: Auférte ab illo mnam, et date illi, qui decem mnas habet. Et dixerunt ei: Dómine, habet decem mnas. Dico autem vobis: Quia omni habénti dábitur, et abundábit: ab eo autem, qui non habet, et, quod habet, auferétur ab eo.

Offertorium Ps. 88, 25

Véritas mea et misericórdia mea cum ipso: et in nómine meo exaltábitur cornu ejus.

Secreta

Laudis tibi, Dómine, hóstias immolámus in tuórum commemoratióne Sanctórum: quibus nos et præséntibus éxui malis confídimus et futúris. Per Dóminum nostrum.

Pro S. Gregorio

Secreta

Sancti tui, quæsumus, Dómine, nos ubique lætíficent: ut, dum eórum mérita recólimus, patrocínia sentiámus. Per Dóminum nostrum.

Communio Matth. 24, 46-47

Beátus servus, quem, cum vénerit dóminus, invénerit vigilántem: amen, dico vobis, super ómnia bona sua constítuet eum.

Postcommunio

Refécti cibo potúque cælésti, Deus noster, te súpplices exorámus: ut, in cujus hæc commemoratióne percépipimus, ejus muniámur et précibus. Per Dóminum nostrum.

Pro S. Gregorio

Postcommunio

Præsta, quæsumus, omnípotens Deus: ut, de percéptis munéribus grátias exhibéntes, intercedénte beáto Gregório Confessóre tuo atque Pontífice, beneficia potióra sumámus. Per Dóminum.

IMPRIMATUR.

Passavia, die 2 Februarii 1953

DR. FRANCISCUS RIEMER
Vicarius Generalis

Graduale Sap. 4, 13-14 Consummátus in brevi explévit témpora multa. **V.** Plá-cita enim erat Deo ánima illíus: propter hoc properávit educere illum de médio iniquitátum.

Allelúja, allelúja. **V. Ibid., 16** Condémnat autem justus mórtuus vivos ímpios, et juvéntus celérius consummáta longam vitam injústi. Allelúja.

✠ Sequéntia sancti Evangélii secúndum Matthæum

Matth. 19, 16-21

In illo témpore: Ecce, unus accédens ad Jesum, ait illi: Magíster bone, quid boni fáciam, ut hábeam vitam ætérnam? Qui dixit ei: Quid me intérogas de bono? Unus est bonus, Deus. Si autem vis ad vitam íngredi, conserva mandáta. Dicit illi: Quæ? Jesus autem dixit: Non homicídium fácies: Non adulterábis: Non fácies furtum: Non falsum testimónium dices: Honóra patrem tuum et matrem tuam, et díliges próximum tuum sicut te ipsum. Dicit illi adoléscentis: Omnia hæc custodívi a juvéntute mea: quid adhuc mihi deest? Ait illi Jesus: Si vis perfectus esse, vade, vende, quæ habes, et da paupéribus, et habébis thesáurum in cælo: et veni, séquere me.

Offertorium Ps. 115, 16-17 O Dómine, quia ego servus tuus: ego servus tuus et filius ancillæ tuæ: dirupísti víncula mea, tibi sacrificábo hóstiam laudis.

Secreta

Réspice, miséricors Deus, dona, quæ offerimus, recoléntes ánimo caritátem: qua beátus Joánnes inter hæc mystéria flagrábat. Per Dóminum.

Pro S. Silvestro

Secreta

Quæsumus, Dómine: ut, dum hæc múnera divínæ majestáti tuæ reverénter offerimus; pia mentis præparatióne et cordis puritáte, beáti Silvéstri Abbátis imitatóres effécti, Corpus et Sanguinem Filii tui sancte percípere mereámur. (Qui tecum vivit et regnat.)

Pro S. Petro

Secreta

Hóstias tibi, Dómine, beáti Petri Mártiris tui atque Pontíficis dicátas méritis, benignus assúme: et ad perpétuum nobis tríbue proveníre subsídium. Per Dóminum nostrum.

Communio Cant. 6, 2: 3, 4 Ego dilécto meo, et diléctus meus mihi, qui páscitur inter lília. Inveni, quem diligit ánima mea: ténui eum, nec dimittam.

Postcommunio

Cælésti épulo reféctis præsta nobis, quæsumus, miséricors Deus: ut, beáti Joánnis vestígia sequéntes, viam mandatórum tuórum dilatáto corde curámus. Per Dóminum nostrum Jesum Christum, Filium tuum: Qui tecum vivit et regnat in unitáte Spíritus Sancti Deus.

Pro S. Silvestro

Postcommunio

Divína dape reféctis tríbue, quæsumus, Dómine: sancti Silvéstri Abbátis vestígiis ita inhærére; ut copiósam mercédem in regno glóriæ tuæ cum Sanctis habeámus. (Per Dóminum.)

Pro S. Petro

Postcommunio

Refécti participatióne múnemis sacri, quæsumus, Dómine, Deus noster: ut, cujus exséquimur cultum, intercedénte beáto Petro Mártire tuo atque Pontífice, sentiámus efféctum. Per Dóminum nostrum.

INDEX ALPHABETICUS

	pag.		pag.
Achatii et Soc. Mm. Commemoratio. 22 Junii	16*	Mariae B. Virg. omnium gratiarum Mediatrix,	
Afræ Mart. Commemoratio. 7 Augusti	19*	duplex majus. 31 Maji	14*
Altmanni Ep. et Conf., duplex majus. 8 Aug.	19*	— — Patronæ Bavariae, duplex I classis. Sab-	
Barbaræ Virg. et Mart., duplex majus. 4 Dec.	1*	bato primo mensis Maji	9*
Bennonis Ep. et Conf., duplex majus. 16 Junii	16*	Maximiliani Ep. et Mart., Diocesee Patroni,	
Bonifatii Ep. et Mart., duplex II classis. 5 Junii	16*	duplex I classis cum Octava communi. 12 Oct.	23*
Clementis Mariæ Hofbauer Conf., duplex majus.		Nothburgæ Virg., duplex. 13 Septembris	21*
15 Martii	5*	Petri Canisii Conf. et Eccl. Doct., duplex II	
Conradi a Parzham Conf., dupl. II cl. 21 Apr.	6*	classis. 27 Aprilis	8*
Corbiniani Ep. et Conf., duplex. 9 Septembris	21*	Reliquiarum sacrarum, quæ in Ecclesiis diocē-	
Crescentiæ Höss Virginis, duplex. 5 Aprilis	6*	seos asservantur, duplex. 5 Novembris	25*
Dedicatio Ecclesiæ Cathedralis, duplex I classis		Rosalie Virg., duplex. 4 Septembris	20*
cum Octava communi. 27 Julii	19*	Ruperti Ep. et Conf., duplex majus. 27 Martii	5*
Dedicatio Ecclesiæ propriæ, duplex I classis cum		Severini Abbatis, duplex. 19 Januarii	3*
Octava communi. 22 Octobris	24*	Stanislai Kostkæ Conf., duplex. 13 Novembris	26*
Floriani Mart., duplex majus. 4 Maji	11*	Stephani Protomartyris, Patroni principalis Ci-	
Godehardi Ep. et Conf., duplex majus. 5 Maji	11*	vitatatis episcopolis et Titul. Eccl. Cathedr.,	
Guntheri Eremitæ, semiduplex. 9 Octobris	23*	duplex I classis cum Octava communi. 26 Dec.	1*
Hartmanni Ep. et Conf., duplex. 23 Decembris	1*	— — Inventio, duplex majus. 14 Augusti	20*
Henrici Imperatoris, Conf., duplex. 15 Julii	18*	Udalrici Ep. et Conf., duplex. 4 Julii	17*
Hildegardis Virg., duplex. 17 Septembris	21*	Valentini Ep., Conf., Dioces. Patroni, duplex	
Irmengardis Virg., duplex. 17 Julii	18*	I classis cum Octava communi. 7 Januarii	1*
Joannis Berchmans Conf., duplex. 26 Nov.	28*	— — Translatio, duplex majus. 11 Augusti	20*
Joannis Nepomuceni Martyris, duplex majus.		Walburgæ Virg., duplex. 25 vel 26 Februarii	5*
16 Maji	13*	Willibaldi Ep. et Conf., duplex. 9 Julii	17*
Leonardi Abbatis, duplex. 6 Novembris	26*	Wolfgangi Ep. et Conf., duplex. 31 Octobris	25*
Leonis IX Papæ et Conf., duplex. 19 Aprilis	6*	Xysti, Felicissimi et Agapiti Mm., dupl. 13 Aug.	20*

† Juxta declarationem S. Rituum Congregationis d. 28 Aprilis 1914 in hoc Proprio Asterisco notantur Sancti vel Beati, qui neque in Martyrologio Romano descripti sunt neque publico cultu a Sancta Sede certe decreto vel confirmato potiuntur, sed ex immemorabili consuetudine publico ac religioso cultu honorantur cum Officio et Missa.



SACRA CONGREGATIO
RITUUM

PASSAVIEN.

Kalendarium perpetuum cum Missarum et Officiorum propriis Diœceseos Passaviensis, post reformationem Officii Divini per Pium Papam decimum fel. rec. peractam, die 5 Martii 1914 approbatum est. Nunc vero R. P. D. Sigismundus Felix Episcopus Passavien. Kalendarium novum cum respectivis propriis pro approbatione Sanctissimo Domino nostro Pio Papæ XI humillime subjecit, in quo præter illa, jam 1914 approbata festa, alia quoque ponuntur, partim Sanctorum nuper canonizatorum, partim aliorum, quæ antea jam celebrabantur, et quæ hodie adhuc a Clero et fideli populo enixe desiderantur. Quum vero Sacra Rituum Congregatio, de mandato Sanctissimi, Proprium Passavien. exhibitum a se revisum, prouti in superiori prostat exemplari, probari posse censuerit, ipse Sanctissimus Dominus Noster referente infrascripto Cardinali Sacræ Rituum Congregationi Præfecto, prædictum Proprium in usum Cleri diœceseos Passavien. approbavit et ab universo Clero ejusdem diœceseos amodo adhibendum concedere dignatus est, servatis de cetero Rubricis et Decretis et præsertim declaratione de Sanctis vel Beatis alicubi publico cultu honoratis, absque certo S. Sedis decreto vel indulto, diei 28 Aprilis 1914. Contrariis non obstantibus quibuscumque.

Die 13 Martii 1935



C. CARD. LAURENTI, S. R. C. Præfectus

A. CARINCI, S. R. C. Secretarius

APPROBATIO

Concordat cum Originali approbato.

Passaviæ, die 24 Martii 1940

DR. FR. RIEMER

Vic. Gen.

IMPRIMATUR.

Passaviæ, die 25 Martii 1940

† SIMON CONRADUS O. S. B.

Epps. Passav.